



Հայկական գիտահետազոտական հանգույց Armenian Research & Academic Repository



Սույն աշխատանքն արտոնագրված է «Ստեղծագործական համայնքներ
ոչ առևտրային իրավասություն 3.0» արտոնագրով

**This work is licensed under a Creative Commons Attribution-NonCommercial
3.0 Unported (CC BY-NC 3.0) license.**

Դու կարող ես.

պատճենել և տարածել նյութը ցանկացած ձևաչափով կամ կրիչով
ձևափոխել կամ օգտագործել առկա նյութը ստեղծելու համար նորը

You are free to:

Share — copy and redistribute the material in any medium or format


Adapt — remix, transform, and build upon the material

22
U-79

1525

ՄԱՏԵՆԱԴԱՐԱՆ

ԿՈԿՈՅԵԱՆ ՀԱՅ ՕՐԻՈՐԳ-
ՈՒՍՈՒԹՆԱՐԱՆԻ

ՀԱՄԱՐ 

2010



Handwritten text in a cursive script, possibly a signature or a note, located at the top of the page. The text is written in dark ink on aged, yellowish paper. It appears to be a name followed by a date or a reference number, though the characters are difficult to decipher due to the cursive style and fading. The first part of the text is written on a single line, while the second part is written on a line below it, starting with a large, stylized initial.

RESCUEE

RESCUEE

RESCUEE

ՊԵՏԱՍԻԱՆԻՔ

ՄԻՒԹԱՐԱՅ ՔԱՀԱՆԱՅԻ

ՍԿԵՒՌԱՑԻՈՅ




1850-1851

1850-1851

11467

1850-1851

1850-1851



1850-1851

1850-1851

1850-1851

1850-1851

1850-1851

1850-1851

1850-1851

1850-1851



1850-1851

1850-1851

2001


1851

206
Մ-79

ՊԼՏԸՍԻՆԵՒՔ

ՄԻՒԹԱՐԱՅ ՔԱՀԱՆԱՅԻ
ՍԿԵՒՌԱՅԻՈՅ

ՅԱՂԱԳՍ ՀԱՄԱՊԱՏՈՒՈՒԹԵԱՆ ԵՐԿՈՏԱՍԱՆ
ԱՌԱՔԵԼՈՑ



Ի ՀԱՅՐԱՊԵՏՈՒԹԵԱՆ

Տ. Տ. ՆԵՐՍԷՍԻ ՎԵՀԱՓԱՌ ՍՐԲԱԶՆԱԳՈՅՆ
ԿԱԹՈՂԻԿՈՍԻ ԱՄԵՆԱՅՆ ՀԱՅՈՑ

ԵՒ Ի ՊԱՏՐԻԱՐԻՈՒԹԵԱՆ ՍՐԲՈՑ ԱԹՈՒՈՅՍ
ԵՐՈՒՍԱՂԷՄԻ Տ. Տ. ՅՈՎՀԱՆՆՈՒ ՍՐԲԱԶԱՆ
ԱՐՔԵՊԻՍԿՈՊՈՍԻ

ԵՒ Ի ՊԱՏՐԻԱՐԻՈՒԹԵԱՆ ԿՈՍՏԱՆԴՆՈՒՊՈԼՍՈՅ
Տ. Տ. ՅԱԿՈԲԱՅ ՍՐԲԱԶԱՆ ԱՐՔԵՊԻՍԿՈՊՈՍԻ



2012

ՅԵՐՈՒՍԱԿԷՄ

Ի ՏՊԱՐԱՆԻ ՍՐԲՈՑ ՅԱԿՈՎԲԵԱՆՑ

1857

69
3969
1008
35-479

Ի ՅԻՇԱՏԱԿ ՅԱՒԵՐԺ

ՀԱՆԳՈՒՑԵԼՈՅ ՄՕՐ ԻՒՐՈՅ ՄԱՀՏԵՍԻ

ԳՈՀԱՐԻՆԵ ԲԱՐԵՊԱՇՏՈՒՀԻ ՏԻԿՆՈՁ

ԱՄՈՒՄՆՈՅ ՀԱՆԳՈՒՑԵԱԼ ՊԱՂՏԱՍԱՐ

ԱՂԱՅԻ ՆՈՐԱՏՈՒՆԿԵԱՆ

ՆՈՒԻՐԻՆ ԶՍՈՅՆ

ՄԵԾԱՐՈՅ ՄԱՀՏԵՍԻ ԳՐԳՈՐ ԱՂԱ

ՅՈՒԽՏԱՒՈՐՈՒԹԵԱՆ ԻՒՐՈՒՄ

Ի ՏՆՕՐԻՆԱԿԱՆ ՎԱՅՐՍ ՓԴԿՉԻՆ

1857

ՕՆԿՈՒՑՈՒՄՆ

Օ ՀԱՏԸՆՏԻՐ պատասխանիս Համա-
պատուութեան երկոտասանից Առաքե-
լոց Միտիթարայ մեծիմաստ Քահանայի
Սկեւոացւոյ, քաղցր է մեզ առանձինն
'ի լոյս ընծայեալ ընձեռել յայս նուագ
բանասիրաց Ազգիս . իբր ոչ եթէ ա-
նուս և անտեղեակք զմերայինս վար-
կուցեալ պարունակելոցն 'ի սմա, քան-
զի չիք գլուխ յոյր վերայ աչք են՝ ան-
գէտ այսմ . այլ զի յայտ իմն կամեցեալ
առնել՝ եթէ որպէս զարդիս, նոյն և յոչ
նուագ ժամանակաց անտի էին և են,
որք զառաժան յայսպիսի կանխակալ կար-
ծիս . զՊետրոս յերկոտասանից անտի
գերագունի իմն հասուցեալ պատուոյ
և փառոց առաւել քան զհանգիտա-

Համապատուութեան զմերայինս

պատիւ աշակերտակիցսն : Առ որ եթէ
 մանր ինչ որ միտ դիցէ առ 'ի վերահա-
 սու լինել լիովին՝ բնաւ իսկ բաւ է յու-
 շի կապել զանսուտ բերանոյն զմատաղ
 տիոցն զվճիռ , լինել իբր զմանուկ մի ան-
 մեղ 'ի ժառանգութիւնն խոստացելոցն
 բարեաց յաւիտենից . Սաբի . ԺԸ . Ծ :
 Այ զանխուլ ինչ է այս՝ որոց 'ի խելա-
 պատակս միտք են . թէ և ոչ դոյզն զար-
 մանաց առ իթ , և 'ի մեր իսկ աւուրս Հը-
 ուովմէականն կրօնի նախանձայոյզ ար-
 բանեկաց առ այս կարի զակատումն .
 որք առ 'ի կռիւ ոտին գտանել բարձ-
 րայօն ընդվզանացն՝ զամենայն գուն դը-
 նեն մոգել կախարդել զուշ՝ և զոմանց
 իսկ զմերայնոց . թէպէտ և ոչ երբէք
 վերջացեալք յարժանաւորն պատասխա-
 նուոյ և փաստաբանութեանց ընդ ժա-
 մանակս ժամանակս 'ի մեր կուսէ : Արպէս
 և յառաջակայս փոյթ տարեալ և մեր
 գոյիւ չափ՝ աւելորդ յեղյեղուկս բանից
 թուիցիմք առաջի արկանել առ 'ի մեր-
 կանալ զկէտ նպատակի մեր և զհեղի-

Եւանջ
Բար

Գործք

զուխարի = ճարտար զի վնէ ճարտար-ի
 գուն զիւր = աշխարհ - կանայք պիւր

611
նակին . ոչ եթէ աղօտ ինչ արկանել ըզ-
չքով առաքելոյն Պետրոսի , քա՛ւ 'ի մէնջ .
այլ զի յոյր վերայ որպէս 'ի ներկայումս
պահանջմունք և պատասխանիք են , ա-
մօք յառաջ իբրու վեց հարիւր մետա-
սան յաւուրս Հեթմոյ Հայոց Արքայի , 'ի
թուին Հայոց ՈՂԵ . նոյն պահանջմունք 695
էին և նոյն պատասխանիք , և ոչ աղա-
ւաղ և խառնիխուռն բանիւ՝ որպէս ու-
մանց կարծեցաւ գոլ . և զոր յայժմուս
զգայ Ազգ Հայոց՝ յայնմանէ և 'ի հին ա-
ւուրս Քրիստոսակրօն կղերս Հայաստա-
նեաց սուրբ Եկեղեցւոյ չէ՛ երբէք յետ-
նեալ , զանտեղի առաջարկս Հռովմէա-
կան բաժնին կարի քաջ ծանուցեալ :

Արդ ընդ բարեշնորհ հեղինակին՝
որ առ Ճշմարիտ հայրենասէր բարոյիցն
յօրինեալ զպատասխանիս նուիրէր Հայ-
կազն Արքային , և մեք փութամք բա-
նասիրաց մերոց տալ զայս յընթերցումն՝
յարգարախոհութիւն մտաց , և այս իսկ
է կէտ նպատակի մեր :

Ա . Մ . Գ . :

ՊԼՏԵՍԻՆԵՒՔ

ՄԻՒԹԱՐ ՔԼԿԱՆԱՅԻ ՍԿԵՒՈՒՑԻՈՅ

Յաղագս համապատուութեան երկոտասանից Առաքելոց .
ընդդէմ այնոցիկ՝ որք նուազ ասին զՄետասանն ըստ
իշխանութեան քան զՊետրոս . և զՊատրիարքն մեծ գող
ասին քան զԿաթնուղիկոս :

Ի հրամանէ թագաւորին Հայոց Հեթմոյ և ՚ի յորդոր-
մանէ եպիսկոպոսին Կառաղոնոյ Յակոբայ :

ԱՆՀԱՍԱՆԵԼԻ և անձանօթ ծոցոյ ծը-
նունդ միայնոյ Հօր Միածինն որդի , որ
է լոյս փառայ և նկարագիր էութեան
նորա . մարդասիրապէս եկեալ ՚ի լըու-
մըն մարգարէական տառիցն , և զմեր
նուաստութիւնս ընդ իւրոյ ծայրագու-
նին միացուցեալ Աստուածութեան՝ և
կատարեալ զըստը տնօրէնութիւն մերձ
՚ի կամաւոր չարչարանն սլատուէր տայր
առաքելոցն՝ վասն ելիցն որ կատարելոց
էր յերուսաղէմ , և յաղագս հանդեր-
ձեցոցն նոցա :

Իսկ զծայրագոյնն և զառիթն իսկա-

պէս սիրոյն, զկատարեալ պարգևն ինքնադիմաբար ընձեռէր աշակերտացն՝ առ սեւով «Օ խաղաղութիւն զիմ տամ ձեզ՝ և զխաղաղութիւն զիմ թողում ձեզ » : Եւ զանազանեալ բացորոշէ ՚ի ստորնայնոցս խաղաղութենէ, զի մի պատրեալ ՚ի վայր քարչիցիմք ՚ի հոմանունն . որ ոչ ունի ըստ իրացն հասարակութիւն, այլ ըստ անուանն միայն զնոյնութիւն հրամայէ . « Ոչ որպէս աշխարհս տայ՝ տամ ես ձեզ » . որպէս զի վերամբարձս առնիցէ զմիտս մեր՝ ձգելով առ ինքն ՚ի բարձրն կոյս՝ յամենայն հետեակ նըլաստութենէ : Բայտ որոց որք ընկալան և զհետ ընթացան առանց շեղելոյ և յետս դառնալոյ, անաշխարհիկս կոչեաց զնոսս՝ առ սեւով . « Ի ուք չէք յաշխարհէ աստի » և Պողոս զնոյն ինքն զՔրիստոս ասէ թէ « Եւ խաղաղութիւն մեր, որ աւրար զերկոսեանն մի, և զմիջնորմն ցանկոյն քակեաց՝ զթշնամութիւնն ՚ի մարմնի իւրում » այսինքն զբարձրայօնութիւն, որ անջրպետէ զընդունողս նորա Աստուծոյ . վասն որոյ և այլուր յայտնի ցուցանէ՝ թէ « Օ խորհուրդս քակեմք, և զամենայն բարձրութիւն հպարտացեալ ՚ի վերայ գիտութեանն Աստուծոյ,

և գերեմք զամենայն միտս 'ի հնազան-
դութիւն Քրիստոսի ո: Տեսանես թէ
որպէս 'ի բաց մերժեն զամբարհաւա-
ճութիւն 'ի տէրունեանն հօտէ, զի
մի ոք ինքնասիրութեամբ շուք եղեալ
կամայն՝ անձին իւրում որսացէ փա-
ռըս, որպէս և այժմ յորովս տեսանեմք
հակառակութի յեկեղեցիս՝ սակս գա-
հասիրութեան, կրտսեր վարկանելով
զհամափառան ինքեանց զառաքելական
աթոռան, յաղաղս մարմնական ճոխու-
թեամբ մայրաքաղաքացն, մանուանդ
զաթոռն Հայոց հայրապետութի: Ալ
հիացումն ոչ սակաւ տիրէ իշխանակա-
նիս մասին՝ որ յիս, եթէ որք զայսքան
աւետարանութիւն խաղաղութեան ըն-
կալեալք 'ի Քրիստոսէ, որ և Քրիստո-
սիւն խօսէր՝ թէ ընդէր լծակրո իւք լի-
նիմք 'ի վերայ ճշմարտութեան, ընդ-
վայր հարկանելով զսահմանն՝ զոր Աստ-
ուած եղ՝ և ոչ մարդ:

Որպէս և պատմէ Աւետարանագիրն
թէ կոչեաց առ ինքն զաշակերտան և ըն-
տրեաց 'ի նոցանէ երկոտասանս, անուա-
նեաց և ետ ասէ նոցա զնոյն իշխանու-
թիւն, և ոչ եղ 'ի նոսա զանազանու-
թիւն նախադահութեան ըստ մերոց

կարծեաց : Իսկ յորժամ կրեաց ՚ի նոսա
այսպիսի կիրք որպէս մարդիկ ելով՝ և
դեռևս ոչ ժամանեալք ՚ի կատարելու
թիւն, ասէ ցնոսա Տէր՝ « Աչ է այդպէս ՚ի
միջի ձերում, որպէս որ ՚ի հեթանոսս իշ-
խանքն . այլ որ կամիցի ՚ի ձէնջ մեծ լի-
նել՝ եղիցի ամենեցուն յետին » : Եւ նու-
ցա զայս որպէս սահման յաւիտենական
յանձն առեալ առանց երկբայութեան,
և արդեամբ կատարեալ զպատուէրն,
ամենայն ուրեք զկրտսերութիւն ողջու-
նէին. որպէս Պետրոս առաքեալն ոչ վեր-
ջանայր կոչել զինքն երէց, ըստ խոնար-
հագոյն աստիճանին. և զորս ըստ նոցայն
հաւասար իւր ասելով՝ « Օ երիցունս այ-
սուհեաւ աղաչեմ իբրև զերիցակիցս » :
Եւ Պօղոս՝ որ բազումս վաստակեցաւ
վասն առաւելութեան շնորհացն որ ՚ի
նմա, տրուպ կոչէ զինքն համակարգիցն
և գլուխ մեղաւորաց . և Մատթէոս յետ
բարձրագոյն պատուոյն ընդունելոյ, ոչ
անարժան վարկանի կոչել զինքն մաք-
սաւոր . և զնոյն մեղ աւանդեցին իրա-
սելով՝ ՚ի պատիւ զմիմեամբք ելանել .
և զի՞ է երկայնել զիւրաքանչիւրցն զի-
ջանելն : Իսկ մեր զանց արարեալ զնոցին
հետոցն՝ այլ իմն շաւիղ նորոզ հետազօ-

տեցաք զարտուղի ընթանալով՝ անհա-
 լասարութիւն 'ի հաւասարսն մուծա-
 նելով և առաւելութիւն իշխանութե՛ն,
 որ ոչ ունին գերազանցութիւն 'ի վերայ
 միմեանց . զոմն գլուխ դնելով՝ և զայլն
 իբրև անդամք և ստորանկեալք ընդ նո-
 րին տէրութեամբ : Արպէս ստէ եկե-
 ղեցին Հռովմայ՝ ընդ Պետրոսի լինել իշ-
 խանութք զմետասանսն, և ըստ նոցին
 սարասի զաթոռսն նոցա ընդ Հռովմայ .
 զոր ոչ կարեն ցուցանել յառաքելական
 մատեանցն . բայց եթէ զնախախնամաբար
 հրամայեալն Տեառն առ Պետրոս՝ առ 'ի
 բժշկութիւն մարդկօրէն յանցմանն, և
 յանձնապատան լինելոյն . զայն առեալ
 նիւթ առ 'ի լրումն իւրեանց ախտին՝ ախ-
 տակից համարելով և զսուրբն ինքեանց,
 և ընդ մարմնաւոր նախագահութե՛ն կար-
 ծելով և զհոգևորն և զԱստուածայինն՝
 վարին սիրաբար 'ի վերայ մեր իբրու 'ի
 վերայ հնազանդելոց, և ընդ նոքօք հար-
 կեցելոց . զոր ոչ 'ի լոյ ծանեայ, այլ ես
 ինձէն եղեալ ականատես առնն՝ և ա-
 կանջալուր 'ի նմանէ բանիցն աւետա-
 րանականաց՝ որովք պարծինն մեծ գոլ .
 և զնոյն ինքն յեօթն աւանդեն գլու-
 իրս . սակս որոյ յոլովս տրամաբանեցաք .

զորս վերստին բուռն հարցուք հանդերձ Աստուծով, զորս հարցեալ քննեցաք, և լուծցուք մի ըստ միջէ՝ ոչ մտացածին ինչ բանիւք և կամ ստայօդ ճարտասանութեամբ, այլ առաքելական և մարգարէական բանից վկայութեամբ. և զոր 'ի Քրիստոսէ ընկալան հրաման իշխանութեան: Այլ զայս ոչ առ 'ի քակտումն պատուոյ սրբոյն Պետրոսի, քաւ և մի լիցի, այլ առ 'ի հաստատութի անախտութեան նորա և գերազանցութեան աշխարհական կրից և նախանձու, և 'ի յայանութիւն նոյնութեան երկուստանիցն իշխանութեան, որ պարզ և եցաւ նոցա 'ի Տեառնէ ոչ 'ի վերայ միմեանց, այլ ըստ իւրաքանչիւր միձակացն նոցա, և զայս ևս ոչ տիրելով, այլ լինել օրինակ հօտին յԱստուածայինսն, և տալ զանձն ընդ ամենեցուն 'ի նզովս, զի զամենեւին շահեցին 'ի Քրիստոս: Այլ նախ զժամանակն դիցուք վերոյգրեալ հանդիսին. զի մի անվաւեր և կարծեօք հանդիպելոցն թուեցի, և տպա սկիզբն արացուք հանդիպմանն մերոյ և տրամաբանութեանցն և ընդդիմադրութեան բանիցն նոցա:

Այլ եղև այս 'ի հայրապետութեանն

Հայոց կոստանդեայ քառասներորդ երկրորդ ամին . և ՚ի Թագաւորութեան Արամեան տոհմիս Հեթմոյ , որոյ յոյժ ախորժ Թուեցեալ առաջարկութիս՝ յորժամ լուաւ , և հրամայեաց մեզ գրով արձանացուցանել :

Եկն ՚ի կողմանցն յատալիոյ , ՚ի հայրապետէն Հռովմայ լիւս ըստ ըստինացւոց քառքառոյ , որ Թարգմանի ՚ի լեզուս մեր ղեպան՝ բայց ներգործութեան նուիրակ , ՚ի յերկիրն Քալիլեացւոց ՚ի քաղաքն Պողոմեանց , որ այժմ կոչի Աքաիա . որ իշխէր ըստ հոգևորին ամենայն ծովեզերեացն Փիւնիկեցւոց մինչ ՚ի մեծն Անտիոք , և ամենայն Պաղեստինի , որ ընդ Հռովմայեցւոլք . և ըստ այնց հնազանդելոց առաքէ և առ Հայրապետն մեր ՚ի բանից լուառնելով , որպէս զի ըստ նոցին և նա ընծայաբեր լիցի : Իսկ Հայրապետն մեր սակաւ ինչ հոգ տարեալ այնմ , ապա հրովարտակաւ յուշառնէ ՚ի ձեռն պատգամաւորաց՝ զորս առ այլս առաքեալ , զի ՚ի յանցին և այնր փոյթ տարցին . իսկ նա և ոչ զնոսա ետես , որպէս ախորժէինն՝ և զայրացեալ ցոսմամբ դարձան : Իսկ ՚ի նոյն աւուրս Օչին եղբայր Թա

գաւարին մերոյ , թագաւորական հրա-
մանաւ գնաց հրեշտակու թեամբ 'ի քա-
ղաքն Աքաիա՝ առ Լիկաթն և իշխանսն .
և յետ պատահելոյն միմեանց՝ Լիկաթն
յոյժ մեղադրել էր Ասթուղիկոսին մե-
րոյ՝ որպէս տմարդոյ . զի եթէ ոչ ասէ ,
վասն օտարսիրութեան և հիւրընկալու-
թեան , սակայն վասն բնական հարկին
զոր ունի 'ի Հռովմայ եկեղեցւոյն՝ պարտ
էր տեսանել զմեզ : Այլ նա իբրև եկեալ
առ թագաւորն մեր պատմեալ զամե-
նայն և առաւել ևս . և նորա լստ քը-
նական բարուց ազգիս մերոյ , զայլս
բարձրացուցանողաց և զինքեանս նը-
ւաստացուցանողաց՝ իրաւունս յոյժ
վարկուցեալ զըստգտանան , և իսկոյն
յուշառնեն Հայրապետին մերոյ . և ա-
սեն՝ զի պատրաստեսցէ այր հանդերձ
նամակաւ , կամ հրովարտակ հանդերձ
ընծայիւք ընդ իւրոց հրեշտակացն զի
երթիցէ . և նա անյապաղ յանձն առ-
եալ զպատուէր՝ պատշաճ համարելով
և նա զբանն . և իբր դատեցան , որք մեր-
ձակայքն էին՝ առաքել զոր . իրաւունս
համարեցան զիմ նուաստութիւնս : Այլ
հրամայեաց Ասթուղիկոսն ինձ գնալ՝ և
իմ թէպէտ և տկար գոլով և անպատ-

բաստ 'ի բան , սակայն յանձն առ ի զըն-
թացսն , միայն զայս ետուռ պատուէր
վասն գրեւոցն , զի հնազանդութեան ա-
նուն բնաւ մի յիշեսցի . զի արք ճար-
տասանք են և որսորդք բանի , բայց ըզ-
հակառակն էին գրել :

Եւ զի ձմեռնային էր ժամանակն 'ի
բազում աւուրս ծանրանաւեալք , հա-
զիւ հասաք մերձ 'ի յեւն Գեկաեմբերի
ամսոյ 'ի քաղաքն Ա. քայիա , ընդ մեզ ու-
նելով հրամանաւ Կաթուղիկոսին մերոյ ,
զԵպիսկոսոսն Երուսաղէմի զմերասեռ
գտեալ 'ի Տրայիանուպօլիս : Եւ իբրև
հանդերձեցան հրեշտակք թագաւորին
մերոյ յանդիման լինել Աիկաթին , և մեզ
ետուն պատուէր՝ զի և մէք պատրաստ
լիցուք զկնի նոցա մտանել . և մտեալ
նոցա և ասացեալ զպատուէրն , և մէք
յորով ժամս կացեալ առ դուրս մինչ աւ-
րածամեալ օրն , և զյամեցուցանելոյն
զպատճառն յերկուց իմն կարծեցաք
փաստից , թէպէտ և ոչ իմացաք զստոյ-
գըն . կամ վասն բարձրայօնութեան նազ
գոլով . և կամ խորհուրդ առնելով եթէ
տեսցուք՝ եթէ ոչ , և կամ թէ յես տե-
սանելոյն զինչ ասացուք , զի անդ ու-
նէր զդժնեայ ճարտասանսն՝ որ կային

յայս կայս ծովու , յորոց մին էր Եպիսկոպոսն Ախարոսի :

Հրամայեցին ապա և մեզ մտանել՝ դեռևս անդ գոլով և հրեշտակքն մեր , և իբր մատուցաք զմատեանն և զընծայորն՝ զոր 'ի Աթուղիկոսէ , առեալ զմատեանն ետ Եպիսկոպոսն մեր և ասէ ընդ հեգն , դու ընթերցիր զայդ , և հըրաման առեալ սկսաւ զպատուէր Հայրապետին մերոյ , և իբր փոքր մի ասացաք ոչ ետ թոյլ աւարտել . այլ ինքն սկսաւ զայրացեալ , ասէ՝ առէք և զբերեալ իրդ . զի ես ոչ եթէ վասն մարմնաւոր շահից և ընչից խնդրէի զգալն Աթուղիկոսին Հայոց , այլ վասն հոգեւոր կարգի և օրինաց . զի մի խրամատեալ օցտեսցի ցանկն հայրենի . և շորթեալ անդամքն 'ի գլխոյն՝ յապականուի մատնեսցին . որպէս թէ այլ առաքելական Աթուքն յեկեղեցւոյն Հռովմայն . զոր Տէր հաստատեսց և ոչ մարդ . որպէս ասէ առաքեալն Պօղոս՝ թէ “ Հիմն այլ ոք ոչ կարէ գնել՝ քան զեդեալն որ է Յիսուս Քրիստոս ” : Եւ վասն այսորիկ խնայելով 'ի ձեզ խնդրէաք , զի եկեալ յօգեսցի 'ի գլուխն եկեղեցւոյ :

Եւ թէ յաղագս յոյժ ծերու թեանն՝

զի լուեալ իսկ է մեր, ոչ կարէր անձամբ
 գալ, որպէս ողորմելով ասեմ՝ ընդէր ոչ
 կանուխ առաքեաց զոք. և եթէ յաղագս
 հարկի բերմանցն և դղեկին էր յամելն,
 զի լուաւ ՚ի մէնջ՝ զո՞ր բերեր թերուծի
 միոյ առն պահասութիւն, և այժմ զի՞նչ
 նուաղեաց. և այլ յորովս խօսեցաւ՝ զոր
 ոչ կարեմ ընդ գրով արկանել, և մեք
 լուռ և եթ կայաք: Այլ ՚ի հանդարտելն
 փոքր մի՝ ասէ ցիս դեսպան թագաւոր
 ինն մերոյ Թովմասն, արի աղաչեա՛ կրկին
 զի առցէ զընծայսդ, և իմ աղաչեալ յոյժ,
 և ոչ առ, և ապա յարուցեալ նոյն ինքն
 ՚ի դիմաց թագաւորին մերոյ աղաչեաց,
 որպէս ՚ի դիմաց որդւոյ իւրոյ՝ զոր ինքն
 կոչէր, լուեալ ասէ որդին քո՝ յոյժ դըժ-
 ուարանայ եթէ ոչ առնուցուս. և նա
 զնոյն պատճառեալ՝ եթէ ոչ վասն զգալի
 իրաց սգահութեան էր խնդիրն իմ, յու-
 րըս ծաղը եղեալ յոյժ յետոյ աղաչանօք
 խնդրեաց:

Այլ ասէ Աիկաթն կերիցուք հաց. և
 մեր ոչ առեալ յանձն, ելեալ գնացաք
 յոյժ արտմեալք ընդ արհամարհանս ա-
 ռաքելական Աթուոյն Հայոց. և ինձ
 այսպէս թուի թէ՛ եղև այս ՚ի նախախ-
 նամութենէ Աստուծոյ, զի կամէր շար-

ժեւ զմեզ 'ի գիւտ խորհրդականն և ար-
ժանաւոր երկուց բանիցս այսոցիկ՝ զորս
հանդերձեալ եմք պատմել : Այլ յետ այ-
սորիկ իբրև տօն ընդմիջեցաւ . կոչէ և
քաղցր ցուցանէ մեզ դէմս , և ասէ՝ 'ի
բազում աւուրս կամ էր ինձ զըուցատ-
րել ընդ քեզ . զի լուեալ է իմ վասն
քո , զի այր բանիբունն ես դու յազգն
քո , զի օգտէսք թերևս 'ի քէն , բայց
հարկ տօնիցս ոչ ետ թոյլ մինչև ցայս ,
և այժմ խօսեսցուք :

Այլ իմ պատասխանի արարեալ առ
այն՝ ասեմ , եթէ ոչ եմ որպէս կարծե-
սրդ , և որ ասացն ընդ քեզ , թերևս
ոչ էր տեղեակ յետնութեանս իմոյ . այլ
քոյդ յերկուց պատճառաց՝ զոր ասեսդ .
մի՛ ըստ իմաստասիրական բարուցդ ան-
յաջադկոտութեան , և միւսն՝ ըստ աշա-
կերտութեան Փրկչին անարգամեծարու-
թեան , զոր ինձ էր ասել . զի յոյժ ախորժ
էր ինձ գալն . սակս զի աշակերտեալ
օգտէի . յորոց յոյժ էք հետևեալ Աս-
տուածաշունչ գրոց . բայց որով արտա-
բերեցից բանս սրտիւ , զի տրտմութիւն
ոչ սակաւ էր ինձ՝ զոր արարերն , զի ոչ
ընկալար զընծայսն մեր , զի այն ոչ ա-
ռաւելութիւնն էր առ ձեզ , և ոչ նուա

զու թիւն՝ առ որ առաքեացն . և ոչ ըզնամակն ընթերցար՝ եթէ վկայէի բանիւք թէ ոչ . և զպատուէրն ոչ լուար :

Եւ ժպտեալ առ այն ասէ . այժ արասցուք՝ որպէս կամիս . միայն խօսեսցուք . և ասեմ, եղիցի ըստ բանի քում . և ասէ՝ այր իմաստուն ես՝ որպէս ասացի, և զոր ինչ խնդրեմ, առնես պատասխանի :

Եւ էր ժողով առ նա մեծ յաւուր յայնմիկ . քաղաքապետն որոյ անունն Զուփրի այր խաղաղարար . և Մայէսար¹ Դանիւլան . և Քոմանար² տանն հիւանդանոցին, և ամենայն իշխանք ծովեզերեաց բաց ՚ի Բրէնյէն³, և բովանդակ Ասոֆաթին⁴ . ոչ գիտեմք զպատճառ ժողովոյն թէ վասն մեր էր, և թէ յայլ պետորս : Եւ ասեմ, զհարդ կարացից ընդ ազգի միոյ ողջոյն առնել պատասխանի, մանաւանդ եթէ վասն եկեղեցւոյ է խնդիրն . և մի հայիր յայս՝ եթէ զի առաքեցայ այսր իբր զկատարեալ, զի բազում անգամ լինի յարքունիս, զի վատացն պատահէ բարեբախտութիւն . զի եկեղեցին Հայոց յոժ է փարթամ իմաստնովք և վարժեցելովք Աստուածա-

1 Տէր :

3 Իշխան :

2 Հրամանարար :

4 Փաստաբան :

չունչ գրոց և տեղեկօք՝ որոց վերջինն
 ես եմ: Ի այց որոց բաւական լինիմ, և
 զորոց ունիմ հրաման և վստահութիւն
 ՚ի Հայրապետէն մերմէ, տաց ըստ կարո-
 ղութեան իմոյ պատասխանի. և որոց
 ոչ գրեցից և տարայց. և նա հարուստ
 ժողովեալ քննեալ հանէ ՚ի փարթա-
 մութենէ գանձուց իւրոց. զոր ՚ի հնոց
 և ՚ի նորոց հանեալ, առաքեսցէ առ ձեզ
 պատասխանի. և հաճոյ թուեցաւ բանն
 յոյժ ամենեցուն: Եւ ասեմ՝ միայն տա-
 ցես ինձ տեղի բանի և պատասխանուոյ,
 զի ասէր յորով և սակաւ լսէր. և արդ
 որովհետև իշխանութի ընկալեալ հար-
 ցանել. ասացեր՝ եթէ հիմն այլ ոք ոչ
 կարէ դնել ասէ առաքեալն Պօղոս՝ քան
 զեդեալն որ է Յիսուս Քրիստոս. և այդ
 յիրաւի. և ես յաւելում զնոյն ինքն յա-
 ջորդ բանն՝ « Եթէ ոք շինեսցէ ՚ի վե-
 րայ հիմանս այսորիկ հաստատեսցէ »:
 Եւ արդ շինեսցուք մի խոտ յայրումն
 հրոյ, այսինքն՝ արտաքոյ նոցին վարդա-
 պետութեն, այլ ոսկի և արծաթ փոր-
 ձեալ և զտեալ հրով հոգւոյն ըստ նո-
 ցին բանիցն, զի մնասցէ. և որ շինէն՝
 վարձս առցէ ըստ առաքինի ճարտարա-
 ցրն, և ասեն այս:

Եւ ասեմ, ուստի՞ ունի եկեղեցին
 Հռոմմայ զիշխանութիւնդ զայդ, զի ին-
 քըն դատէ զայլ առաքելական աթոռսն
 և ինքն յայլոց ոչ քննի, զի յաւէտ մեք
 ունիմք կար ըստ առաքելոցն օրինակի
 դատել զձեզ, և դուք ոչ կարէք քննել
 զմեզ, և լուեալ զքանս զայս՝ յոյժ խոժո-
 ռեցան, բայց ոչ արտաբերեցին վասն
 մեծահոգողութեան բարուցն, այլ հար-
 ցանեն հանդարտ բարբառով, և ո՞ ետ
 ձեզ զպատիւդ զայդ: Եւ ասեմ, մի խիստ
 թուեսցի բանդ այդ առաջի ձեր, քան
 զի խոստացաք եթէ ոչ ելլուք արտաքս
 յԱստուածաշունչ գրոց, և ցուցանեմք
 ձեզ ՚ի ծայրագոյն մատեանցն՝ զի դա-
 տեցին այլ Առաքեալքն զՊետրոս՝ խըզ-
 ճելով ևս ՚ի նմանէ, մինչ ինքն ել յԵ-
 րուսաղէմ արդարացուցանել զանձն
 յորժամ մկրտեաց զՎուռնելիոս, որպէս
 պատմէ Ղուկաս ՚ի գործս առաքելոցն
 թէ « Դուան առաքեալքն և եղբարքն,
 որ էին ՚ի կողմանս Հրէաստանի՝ զի և
 ՚ի հեթանոսս ընկալան զքանն Աստու-
 ծոյ: Բայց յորժամ ել Պետրոս Երու-
 սաղէմ, խըճէին ՚ի նմանէ՝ որ ՚ի թլփա-
 տութենէ անտի հաւատացեալքն էին,
 թէ եմուտ առ արս անթլփատս՝ և եկեր

հասց

ընդ նոսա . և սկսաւ Պետրոս պատմել նոցա կարգաւ զտեսիլն , մինչև 'ի վախճան . . . և իբրև սկսայ խօսիլ , ասէ՝ Հոգին սուրբ եկն 'ի վերայ նոցա , և յիշեցի զքանն Տեառն զի ասէր՝ Յովհաննէս մկրտեաց 'ի ջուր , բայց դուք մկրտիցիք 'ի Հոգին սուրբ ։

Տեսանե՞ս՝ զի ոչ միայն ոչ գիտէին ըզնա իշխան՝ առնել զոր ինչ և կամէր , այլև իշխանաբար խղճեալ դատէին ըզնա : Եւ Պետրոս որպէս ոչ գիտելով զինքըն իշխող նոցա , ոչ առնէ իշխանաբար պատասխանի որպէս Տէրն՝ զի ասէր « Իշխանութիւն ունիմ յիմումս տալ որպէս և կամիմ » այլ խոստովանի յԱստուծոյ զհրամանն գոլ , և ոչ իշխանութեամբ՝ ասէ « Իսկ արդ՝ եթէ զհասարակաց պարգևն ետ Աստուած և նոցա՝ որպէս և մեզ՝ 'ի հաւատալն 'ի Տէր Յիսուս Քրիստոս , իսկ արդ՝ զինչ կարող էի արգելուլ զԱստուած . և իբրև լուան զայս և տպա լռեցին » . յայտ է՝ թէ 'ի սատպքննութէն : Տեսանե՞ս թէ որպէս յայտ առնէ զի ոչ է գլուխ Պետրոս : Եւ գիտեմ զի ասեն առ այս , եթէ ոչ զառաքեալսն ասէ խղճեալ՝ այլ զդեռևս հաւատացեալսն , և զայն արար Պետրոս

վասն նոցա տկարութեան՝ շահեւով ըզ-
նոսա, որպէս ասէ Պօղոս՝ թէ « Օ տկա-
րացեալն ՚ի հաւատս ընկալարուք » :
Ըս որս ասեմք՝ թէ ոչ գոյր առ նոսա
տկար. զի ասէ թէ « Վր ամենեցուն սիրտ
և անձն մի », և դարձեալ եթէ ոչ էին
մետասանքն, ում պատասխանի առնէր
Պետրոս թէ « Իբրև սկսոյ խօսիլ, Հո-
գին սուրբ եկն ՚ի վերայ նոցա, որպէս
՚ի վերայ մեր ՚ի սկզբանն » : Ի սկզբանն ՚ի
վերնատանն ոյք էին, եթէ ոչ երկոտա-
սանքն միայն, և կամ ում պատմեաց, ե-
թէ ոչ լսողացն ՚ի աեառնէ և գիտողաց
բանին թէ « Յիշեցի զբանն Տեառն՝ զոր
ասէրն թէ Յովհաննէս մկրտեաց ՚ի ջուր,
բայց դուք մկրտիցիք ՚ի Հոգին սուրբ » :
Տեսանէք թէ որպէս ստուգեցաւ դա-
տումն Պետրոսի ՚ի մետասանիցն, և ոչ
ուրեք երևի թէ Պետրոս այսպէս դա-
տեալ է զմետասանսն :

Եւ դարձեալ ասեմ յաղագս սիրոյ,
զորոյ ունին վստահութիւն յանձն առ-
նուլ՝ աղաչեմ զձեզ ըստ առաքելոյն
գթութեամբն Աստուծոյ, և խրատ
տամ որպէս եղբայր յեղբօրէ զօրաց-
եալ՝ ոչ դնել զուձն զայն յեկեղեցի,
զոր ոչ բարձրին արարի մեր, այսինքն՝

62452
8071



զճառայական հնազանդութիւնն՝ և ոչ մէք կարեմք բառնալ : Իսկ յազազս սիրոյն՝ զոր ունիմք հրաման յԱստուծոյ և ՚ի սրբոց առաքելոցն՝ պատրաստ եմք որպէս ասաց Քրիստոս՝ թէ « Յայսմ ծանիցեն զձեզ՝ թէ իմ աշակերտք էք՝ եթէ սիրիցէք զմիմեանս », և Պօղոս յառկացուցանէ առաւել հարկաւոր գող ՚ի վերայ եկեղեցականն զարդու՝ զսէրն, ասելով « Օրոս եղ Աստուած յեկեղեցւոջն՝ այս են, նախ՝ զառաքեալն, երկրորդ՝ զմարգարէսն, երրորդ՝ զվարդապետսն », և որ ՚ի կարգին են անդամք եկեղեցւոյ : Եւ յորժամ թուէ զիւրաքանչիւրոց շնորհսն՝ ասէ « Նախանձաւոր լերուք լաւին, բայց ես առաւել ճանապարհ ցուցանեմ ձեզ, զի թէ զլեզուս մարդկան խօսիցիմ և զհրեշտակաց, և թէ ունիցիմ մարգարէութիւն և զհաւատս մինչև զլերինս փոփոխելոյ, և սէր ոչ ունիցիմ, ոչ ինչ օգտիմ » :

Եւ Յովհաննէս ասէ ՚ի Կաթուղիկէն թէ « Եւս է պատուիրանն Հօր, զի հաւատասցուք յանուն որդւոյնորա Յիսուսի Քրիստոսի, և սիրեսցուք զմիմեանրս, զի այս է պատուէր նորա » : Երդ՝ այսմ բարձրագոյն պատուիրանացս որ

Մատուցոյ՝ և աստուածայնոցն յամենայնի պատրաստ է եկեղեցին Հոյոց . ոչ արդէն իսկ սկսմամբ , այլ ՚ի վաղընջուց որպէս նախնական աւանդեալ բերէ ժառանգութիւն զսէրն . մանաւանդ առ Հռովմայեցիսդ , որպէս և վկայեն որք աստ կան ՚ի ձերոցդ՝ որ ոչ են անտեղեակ մերոցն և առ այլ ազգս՝ թէպէտ և ոչ համեմատ ձեզ , սակայն անգորրայեալ են իւրաքանչիւր ազգաց առաջնորդքն ըստ կարգի իւրեանց և պաշտաման յաստուածապարզ և թագաւորութի մեր , ոչ ինչ ունելով հարկ Մատուածասէր Թագաւորէն մերմէ՝ յաղագս քահանայական կարգի և աւանդութեան եկեղեցւոյ՝ զոր խնդրեմք Մատուցոյ անշարժ մնալ ՚ի Հայս :

Ասէ Լիկաթն՝ ոչ եթէ խափան լինելով պատուիրանի սիրոյն խնդրեմք զհնազանդութիւն , այլ որպէս շողկապ լինելով՝ որպէս յապացուցէն ունիք ուսանիլ որպէս բոլոր անդամք ՚ի մարմնի ամբողջ են ՚ի գլուխն յօդմամբ սիրով , այսպէս և ամենայն եկեղեցիքն պարտին հնազանդ լինել եկեղեցւոյն Հռովմայ . որպէս գլխոյ՝ զի ամբողջ մնացեն անգամքն :

Այլ պատասխանի ետու առ այս . թէ հնազանդութիւն ոչ կարեմք առնուլ յանձն՝ որպէս Սատուածոյ պարգևեալ մեզ ազատութիւն հաւասար ձեզ ըստ երկոտասանիցն՝ զի հնազանդութի ծառայական է և աշխարհական և ոչ առաքելական, որպէս սահմանեալ աւանդեցին մեզ առաքեալքն թէ որոնց և ում պարտ է հնազանդ լինել . գրէ երանելին Պետրոս թէ « Հնազանդ լերուք մարմնեղէն ստեղծուածոց՝ եթէ թագաւորի, իբրև առաւել ումեք » և Պօղոս թէ « Հնազանդ լերուք տերանց » և ոչ զերկոտասանսն միմեանց իշխեցին գրել . գիտելով զի Սատուած բանն եբարձ ըլլածառայական հնազանդութի յինքեանց աւսելով « Դուք չէք ծառայք, զի ծառայն ոչ ինչ գիտէ զտեսառնն, այլ դուք բարեկամք էք իմ և խորհրդակիցք » : Արդ՝ զիմրդ կարիցեմք յանձն առնուլ զհնազանդութիւն վերստին ծառայ լինել հակառակ ազատութեանն՝ որ ՚ի Քրիստոստ սուլաւ մեզ : Այլ վասն այսորիկ լռեալ այն օր, իսկ վաղիւն ասէ Աիկաթն՝ ոչ խնդրեմք ՚ի ձէնջ հնազանդութիւն որպէս ծառայից առ տէր, այլ որպէս որդւոյ առ՝ հայր, որպէս գրէ Պօղոս թէ

“ Արդիք հնազանդ լերուք հօր ” :

Պատասխանի ետու և ասեմ, թէ յայդմ մասին Քրիստոս արգելու զմեզ թէ “ Հայր մի կոչէք զոք ձեզ ՚ի վերայ երկրի, զի մի է Հայրն ձեր՝ որ յերկինս է ”, և Պետրոս երկրաւոր է՝ և ոչ երկնաւոր. արդ զիա՞րդ կարեմք թողուլ զորդեգրութիւն Հօրն երկնաւորի, և լինել որդի Պետրոսի՝ անսալով իրատու ձեր՝ և զանց առնել զխրատովն Քրիստոսի Աստուծոյ մերոյ, զի յայսմ մասին և ինքն Պետրոս զգուշացուցանէ զմեզ թէ “ Հնազանդիլ պարտ է Աստուծոյ առաւել քան մարդկան ” : Իարձեալ զի հարս սովոր եմք կոչել վերստին ճնողսն աւաղանաւն, և առաքեալն Պետրոս ոչ է մկրտեալ զմետասանսն, և նոքօք բզմեզ, զիա՞րդ կոչիցեմք զնա Հայր : Իսկ եթէ ասիցեն, ընդէ՞ր բնաւ բառնայք զհնազանդութիւն յեկեղեցւոյ, ո՞չ յիշէք զասացեալսն ՚ի Պողոսէ առ Կորինթացիսն թէ “ Իխաէք զտունն Ստեփանեայ և Փորտունատեայ՝ որք զանձինս իւրեանց կարգեցին ՚ի պաշտօն սրբոցն. ազաչեմ զի և դուք հնազանդ լինի՞լիք նոցա ” և որ սոցին նման գտեալ ՚ի դիրքս : Ասասցուք նոցա՝ թէ ոչ զստորնայ

նոցն հնազանդութիւն բառնամք 'ի վեր-
նոցն, այլ զերկոտասանիցն միայն, որք
զմի և զնոյն ունին իշխանութիւն և սլա-
տիւ :

Ասէ Լիկաթն հանդերձ ընկերօքն
շարժեալք յոյժ, զիմորդ ոչ է գլուխ
Պետրոս առաքելոցն :

Պատասխանի ետու և ասեմ, ոչ գի-
տեմ զզիարդն :

Եւ ասէ. ո՞րպէս ոչ գիտես. զի յետ
համբառնալոյն զնա եղ գլուխ Քրիստոս :

Եւ ասեմ, բնաւ այդմ ոչ եմ տեղ-
եակ. և այս յերկուց պատճառաց՝ կամ
'ի մոռացմանէ յետ ընթեռնլոյն որպէս
մարդ ելով, և կամ թէ ոչ հասին առ
մեզ գրեալքն. այլ ինձ յոյժ է պարծանք՝
եթէ յայսմ աշակերտեցայց եկեղեցւոյն
Հռովմայ, աղաչեմ ուսուցանել ինձ,
բայց ոչ 'ի բանից արտաքոյ չորիցս այ-
սոցիկ գրոց. Աւետարանին և պրակացն՝
և թղթոցն կաթուղիկէից, և Պօղոսի
առաքելոյն, և այսոցիկ մեք հնազանդի-
ցեմք որպէս Աստուծոյ հրամանացն :

Ասէ Լիկաթն որպէս օրինակաւ,
յորժամ թագաւորն ձեր ելանէ յերկ-
րէն ո՞չ կացուցանէ 'ի տեղի իւր գլխա-
ւոր :

Եւ ասեմ, այո՛ :

Եւ ասէ, հնազանդիք նմա առ հասարակ :

Եւ ասեմ. ոչ վասն նախապատուութեան հնազանդիմք, այլ որքան տայ նրմա իշխանութիւն թագաւորն :

Եւ ասէ. այսպէս ամենայն Պատրիարք և Կաթողիկոս և արժուէսք և վէսք պարտին հնազանդ լինել անթողն Պետրոսի որպէս գլխաւորի, և զի յաճախ ըստ այսմ կարգի թուէր զԿաթողիկոս. ընդ որ յոյժ բերեալ իմ, զոր յետոյ պատմեսցուք զպատասխանիս :

Եւ ասեմ առ այն, եթէ ցուցանէք յառաքելական մատեանցն, եթէ յելանելն իւր Քրիստոս եղ զՊետրոս գլուխ երկոտասանիցն՝ ընդունիմք, որպէս եմք ծառայք նորա : Իայց և մէք ոչ եմք անտեղեակ ելից Փրկչին. ըստ այնմ թէ « Ելանեմ ես առ Հայրն իմ » . զի երկու են ելք, մին զօրութեամբ՝ յորժամ հանդերձեալ էր կամաւոր չարչարանօք մահուն ելանել, ասէր « Ելթամ ես առ առաքիչն իմ. իսկ միւթարիչն Հոգին սուրբ՝ զոր առաքեսցէ Հայր յանուն իմ, նա եկեալ ուսուցէ ձեզ զամենայն և յիշեցուցէ ձեզ՝ զոր ինչ ասացի ձեզ » :

Իսկ յերկրորդն և յիսկրայէս համբառնալն սրտովէ Ղուկաս թէ «Յայնժամ եբաց զաչս նոցա և ասէ, դուք էք վկայք այսոցիկ որ եղև՝ զոր յառաջագոյն ասացի, և ասի՛ ես առաքեմ զաւետիս Հօր իմոյ ՚ի ձեզ, և դուք նստարուք ՚ի քաղաքիդ Երուսաղէմ, մինչև զգենուցուք զօրութիւնն ՚ի բարձանց. եհան զնոսա մինչև ՚ի Բեթանիա, և ամբարձեալ զձեռս իւր՝ օրհնեաց զնոսա. և եղև յօրհնելն նորա զնոսա՝ մեկնեցաւ ՚ի նոցանէ և վերանայր յերկինս. և նոքա երկրպագեալ դարձան յԵրուսաղէմ», և յայսոսիկ առաւել եցոյց զհամապատուութիւնն. զի ձեռնադրեաց զնոսա և օրհնեաց համակարգս, և յետ իւր ՚ի Հոգին սուրբ արար զնոսա ասրաստան, և ոչ ՚ի Պետրոս. արդ՝ ո՞ւր է դրնելն զնա գլուխ երկոտասանիցն:

Դարձեալ ասեն, ապա ո՞չ է գլուխ Պետրոս առաքելոցն, և կարի յաճախ՝ որպէս զի յուրաստ եղէց՝ զի չարախօսեսցեն զինէն իբրև զհերետիկոսէ:

Եւ ասեմ, ոչ կարեմ ասել թէ է. և կամ թէ ոչ է. զի յերկուց կողմանց է վասնզն. զի ո՞րպէս ասիցեմ թէ ոչ է՝ հակառակ եկեղեցւոյն Հռովմայ, և զի

անդ կարիցեմ ասել թէ է . զի ոչ եմ
ընթերցեալ 'ի նոր Կտակարանս :

Եւ ասեն , ո՞չ գրեալ է՝ թէ դու ես
վէմ , և զոր յաղագս վիմին՝ յիւրում
տեղւոջն ասասցուք : Իսկ ընդդիմակայ-
ու թեամբ ասեմ . այլ է վէմն անուն , և
այլ է գլուխն . գլուխ խոստացայք , ցու-
ցէք յատուկ և ես ընդունիմ : Եւ իբ-
րև ոչ կարացին 'ի գրոց ցուցանել , բա-
նիւ ջանացին որսալ :

Եսեն , դու վարդապետ գոլով ո՞րպէս
քարոզէիր :

Եսեմ՝ որպէս յատենի Տեառն հա-
սեալ կամ 'ի պատասխանատրութիւն
ընդ որոց խօսեցայց , վասն որոյ հարկ է
զճճմարիտն ասել , ես 'ի բեմբասացու-
թեան իմում որպէս գլխաւոր վերա-
պատմէի զՊետրոս և զՊօղոս :

Եւ Լիկաթն , ոչ է գլուխ Պօղոս .
քանզի միոյ եկեղեցւոյ , ասէ՝ երկու
գլուխ ոչ վայելէ :

Եւ ասեմ , այդ յիրաւի՝ քանզի ճշ-
մարիտ գլուխ եկեղեցւոյ Քրիստոս է ,
որպէս ասէ առաքեալ առ Եփեսացիս՝
եթէ « Յարոյց զՔրիստոս , և զնա եդ
գլուխ 'ի վերայ ամենայն իրիք եկեղե-
ցւոյ , որ է մարմին նորա . լուսնն՝ որ զա-

մենայն յամենայնի ընու » . և ոչ Պետրոս
որ ասէ մարմին զեկեղեցի և զնա լցու-
ցանող : Եւ յաղագս այսր յորով եղև
տարաբերու թիւն , մինչ զի ձանձրանալ
լսողացն , զի կրկնաբանէին եթէ դու
զիսորդ ասէիր զՊետրոս գլուխ :

Եւ ասեմ կարճառօտ , որպէս զՅով
հաննէս Եփեսոսի և զԹովմաս Հնդկաց ,
և զԲարթուղիմէոս Հայոց և զայլն :

Եւ ասեն , այդպէս միայն՝ և ոչ ընդ-
հանուր :

Եւ ասեմ , ընդհանուր գլուխ Քրիս-
տոս է որպէս ասէ դարձեալ Պողոս առ
նոսին , թէ « Եւր է գլուխ կնօջ , որ-
պէս և Քրիստոս գլուխ է եկեղեցւոյ
և ինքն է Փրկիչ մարմնոյ » , և ոչ է ար-
ժան հրաժարել մեզ ՚ի փրկու թենէ գլու-
խոյն , որ է Քրիստոս :

Եւ ասեն , Քրիստոս ՚ի յերկինս է գլու-
խ , և Պետրոս ՚ի յերկրի :

Եւ ասեմ , այդմ դարձեալ Պողոս
առնէ պատասխանի ՚ի Կողոսացւոյ թրղ-
թին՝ եթէ « Եովաւ հաստատեցաւ ա-
մենայն որ ինչ յերկինս՝ և որ ինչ յերկ-
րի՝ որ երևին և որ ոչ , եթէ աթուք ,
եթէ տէրութիւնք , եթէ պետութիւնք
և եթէ իշխանութիւնք , ամենայն ինչ

նովաւ՝ և ՚ի նոյն հաստատեցաւ և նու
վաւ եկաց բովանդակ . և նա է գլուխ
մարմնոց եկեղեցւոյ , որ է սկիզբն անդ-
րանիկ ՚ի մեռելոց՝ զի եղիցի ինքն յա-
մենայնի յառաջացեալ » . տեսանե՞ս թէ
սրպէս ընդ միով պարփակեաց գլխով
զերկնայինս և զերկրաւորս եկեղեցի ,
և եբարձ զայդպիսի կարծիք :

Եւ արդ ասացեալ յաղագս տրամա-
բանութեան սկիզբն արասցուք բանի-
ցն , զոր յաւետարանչացն բերեն ընդ-
գէմ մեր , որովք մեծ կարծեն գոլ զին-
քեանս . զոր խոստացաք ըստ մասին ան-
յանել :



ԲՆՆ ԱՌԱՅԻՆ

Եւսէ Լիկաթն . ընդ Պետրոս միայն
ասաց Տէրն , “ Դու ես վէմ և ՚ի վերայ
այդր վիմի շինեցից զեկեղեցի իմ ” :

Պատասխանի ետու և ասեմ , նախ վէ-
մըդ՝ զոր ասէք յորոյ վերայ յարդարի շի-
նուածն՝ ըստ օրինակի զգալի ձեռակեր-
տաց ոչ ցուցանի գլուխ , քան թէ յօտն
յաւէտ , որպէս նոյն ինքն Քրիստոս հրա-
մայէ , թէ “ Ար լի է զբանս իմ և պահէ ,

նման է առն իմաստնոյ՝ որ շինեաց զտուն
իւր ՚ի վերայ վիմի զի իջին անձրեք, շնչե-
ցին հողմք և խաղացին գետք և բաղխե-
ցին զտունն՝ և ոչ կործանեցաւ. քանզի
՚ի վերայ վիմի հաստատեալ էր Կ :

Տեսանէս՝ թէ որպիսի վկայիւ հաս-
տատեցաւ թէ ոչ է գլուխ վէմն՝ այլ
ստորին մասն :

Այլ Գրք :

Օ ի ոչ եթէ նորոգ եգ նմա զվէմն
անուն որպէս մրցանակ դաւանութեան,
այլ զառաջինն յուշ առնէ. զոր ՚ի կոչմա-
նրն անուանեաց. որպէս և գրէ Մատ-
թէոս՝ թէ « Սինչդեռ անցանէր Յիսուս
ընդ եզը ծովուն Գալիլեացոց, ետես
երկուս եղբարս. զՍիմոն՝ զկոչեցեալն
վէմ Կ. և Յովհանէս զնոյն վկայէ թէ
« Եր մին յերկուց անտի եղբայր Սիմո-
նի վիմի Կ և արդ վէմդ անուն կանխա-
գոյն է ՚ի վերայ Պետրոսի որպէս ցու-
ցաւ՝ և զի ոչ ասաց թէ, դու եղի-
ցիս վէմ, այլ թէ զի դու ես վէմ, որ-
պէս թէ դու ինքն վէմ ես : Ապա յայտ
է, թէ զմետասանսն ևս կոչեաց յայտմ
վայրի վէմ. զի ոչ ասաց եթէ ՚ի վերայ
քո շինեցից զեկեղեցի իմ՝ այլ եթէ ՚ի

վերայ այդ ր վիմի շինեցից . զառ ընթերան
ցուցանելով, զի վէմք են և այլքն 'ի հի-
մունս եկեղեցւոյ . որպէս վկայէ Եսայիաս
վասն այսր , որպէս 'ի դիմաց Աստուծոյ
թէ « Ահա ասիկ պատրաստեալ եմ կար-
կեհան զքարինս քո , և զհիմունս քո շա-
փիւղայ , և ամից շուրջ զքե պարիսպ
յընտիր քարանց պատուականաց , և զոր-
դիս քո խրատեալս Աստուծոյ » :

Տեսանե՞ս թէ որպէս ցուցանէ զեր-
կոտոսանան զոր ընտրեաց Տէր . և որդիք
խրատեալք ո՞յք են , եթէ ոչ՝ որք խրա-
տեցաք Աստուածն բանէ . և Դաւիթ
ասէ , « Հիմունք նորա 'ի լեառն սուրբ
նորա » : | Եառն ասէ զեկեղեցի ըստ այ-
նըմ թէ « Տէր ո՞վ կացցէ 'ի խորանի
քում , կամ ո՞վ բնակեսցի 'ի լեառն
սուրբ քո » . և զի ոչ միայն երկոտասան
քրն են հիմունք եկեղեցւոյ՝ այլ և մար-
գարէքն . զի նոքա վաստակեցին , և ա-
ռաքեալքն 'ի վաստակս նոցա մտին՝ զի
հասարակ վայելեսցեն ըստ տեառն : | Եւ
Պօղոս որ Քրիստոսիւն խօսէր , կնքէ ըզ-
բանս , զի ճշմարտէ ասելովն առ Եփե-
սացիս՝ « Ապա այսուհետև ոչ էք օտարք
և պանդուխտք . այլ քաղաքակիցք սրբ-
բոց և ընտանիք Աստուծոյ . շինեալք 'ի

վերայ հիման առաքելոց և մարգարեից . որոյ գլուխ անկեանն է Յիսուս Քրիստոս , յորում ամենայն շինուածն յողեալ և պատշաճեալ աճէ 'ի տաճար սուրբ տէրամբ » : Ահա եղբարք յայտ եղև թէ ոչինչ ունի Պետրոս առաւելու թիւն վասն վէմն անուանելոյ , այլ հասարակ է ընդ առաքեալս և ընդ մարգարէս 'ի հիմունս եկեղեցւոյ , որոյ գլուխ Քրիստոս է , և ոչ նա :

Այլ պատասխանի :

Իարձեալ զգաւանութիւն ասէ վէմ Քրիստոս , զոր դաւանեաց զնա Պետրոս , թէ « Իու ես Քրիստոսն որդի Աստուծոյ » ըստ նախագուշակութեանն Դանիէլի , զի ասէ « Տեսանէի՝ և ահա վէմն առանց ձեռին հատուալ 'ի լեռնէն » և Պօղոս ասէ , թէ « Վէմն էր ինքն Քրիստոս » . վն այսորիկ ասէ Տէր . « Այլ թէ 'ի վերայ այդր վիմի , այսինքն՝ 'ի վերայ այդր դաւանութեան շինեցից զեկեղեցի իմ » և զի յառաջ քան զՊետրոս դաւանեալ էին մետասանքն զՔրիստոս , յորժամ 'ի չորրորդում պահու գիշերին դայր առ նոսա 'ի վերայ ծովուն . և աշակերտքն առ ահին զաղաղակ բարձին ,

և Յիսուս խօսեցաւ և ասէ ցնոսա, մի
երկնչիք էս եմ. ասէ Պետրոս, Տէր եթէ
դու ես, ասա ինձ գալ առ քեզ. և ա-
սէ եկ. և ՚ի գնալն կամէր ընկզմիլ և
ձեռն ետ նմա, և իբրև ել ՚ի նաւն ընդ
իւր ունելով զՊետրոս և հանդար-
տեաց հողմն. մատեան որք ՚ի նաւին է-
ին՝ երկիրպագին նմա և ասեն, արդա-
րև որդի Աստուծոյ ես դու. և Պետ-
րոս ոչ էր ընդ նոսա. վասն այսորիկ ՚ի
հարցմանն Որդւոյ, շարժեաց զնա Հայր
՚ի դաւանել՝ զի մի նուազ երևեսցի
յայսմ մասին քան զմետասանսն : Ասէ-
Լիկաթն, զՊետրոս Հայր շարժեաց ըստ
ասացելումն :

Առ որ ասեմ, թէ և զամենեսեան
շարժէ Հայր ըստ բանին Տեառն. թէ
“Ոչ որք գայ առ իս՝ եթէ ոչ Հայր իմ
ձգեսցէ զնա”, և Յովհաննէս թէ “Որ
առաքեացն զիս, նա ստաց, թէ յայր
վերայ տեսանիցես զՀոգին, նա է. և մեք
տեսաք և վկայեմք՝ թէ սա է Որդին Աս-
տուծոյ”. և Հայր է որ ամենայն ուրէք
յայտնէ զորդին իւր :

ԲՆՆ ԵՐԿՐՈՐԳ

Ըսէ Լիկաթն, ընդ Պետրոս միայն
ասաց Քրիստոս, թէ “Տաց քեզ զփա-
կանս արքայութեան երկնից. և զոր մի-
անգամ կապեցես յերկրի՝ եղիցի կա-
պեալ յերկինս, և զոր արձակիցես յերկ-
րի՝ եղիցի արձակեալ յերկինս”:

Պատասխանի ետու և ասեմ, եթէ
խոստացաւ միայն յայսմ վայրի, և ոչ
ետ զիշխանութիւնն Քրիստոս, քանզի
ոչ ասաց թէ առ կամ ընկալ, այլ եթէ
տաց քեզ: Տեսանե՞ս եթէ որպէս առ
յապա ցուցանէ զտալն:

Իսկ եթէ ետ անդէն՝ ասացէք եթէ
զի՞նչ է տուեալն, որով պարծիք ՚ի վե-
րայ մեր, զի աստ զփականս միայն յի-
շէ՝ եթէ խոստացաւ և եթէ ետ. և ըզ-
մեծադոյնն որ է բանալն՝ ոչ յաւելու.
և զի՞նչ փառք էր Պետրոսի փականքն
միայն առանց բանալոյ ուր և փարիսե-
ցւոցն զնոյնն ասաց ունել Փրկիչն:

“Վայ ձեզ՝ ասէ, փարիսեցւոց և
դպրաց զի փակէք զարքայութիւն երկ-
նից, դուք ոչ մտանէք՝ և որք մտանենն,
արգելուք”։ Իսկ բանս այս միայն է՝ որ
յատկանայ առ Պետրոսի, և այսու որով

մեծացուցանել կարծէիք, նուաստացուցիք : Իսկ եթէ զկապելն և զարձակելն ասէք՝ որ է ճշմարիտ և բարձրագոյն իշխանութիւն, զայս ոչ միայն Պետրոսի՛ այլ և մետասանիցն խոստացաւ . յորժամ պատուէր տայր նոցա՝ « Թէ մեզ զիցէք եղբայրնք ո՛ր երթ յանդիմանեան զնա միայն . և յանլուր լինելն և յերկրորդումն՝ ասանք յեկեղեցւոջ . և թէ նոցա ևս ոչ լուիցէ, եզիցիք եզ իբրև զհեթանոսն . ամէն ասեմ ձեզ, զոր կապիցէք յերկրի՛ եզիցի կապեալ յերկինս . և զոր արձակիցէք յերկրի, եզիցի արձակեալ յերկինս » . ահա և յայսմ՝ մասին հասարակ երևեցան երկոտասանքն . և որպէս ոչ կամեցաւ Հայր զրկել Պետրոսի անդ ՚ի դաւանութեանն, նոյնպէս աստ Որդի զմետասանն ՚ի խոստմանէն . և զի խոստումն այն որ էր միայն Պետրոսի, և այս՝ որ երկոտասանիցն հասարակ, նոյն ինքն Պետրոս յայտնէ հարցանելովն զՔրիստոս՝ « Տէր քանիցս անգամ թէ մեզիցէ ինձ եղբայրն իմ՝ թողից նմա » : Տեսանէք զի դեռևս ոչ են առեալ զիշխանութիւն, փասն այսուրիկ իբրև զանձանօթ սահմանի իշխանութեանն հարցանէ :

Ասէ Լիկաթն, եթէ այսօրիկ խոստմունք են, ապա ուր են տուրքն, միթէ ստէ՞ Քրիստոս : Այլ ասեմ, ոչ ստէ ճշմարտութիւնն, այլ յետ յարութեանն յորժամ առաքէր զնոսա ետ հասարակ զկատարեալ իշխանութիւնն Հոգւովն սրբով . “ Յերեկոյի միաշաբաթուն յորժամ եմուտ Յիսուս գրօքն փակելովք՝ ուր էին աշակերտքն ժողովեալ, եկաց ՚ի մէջ նոցա և ասէ . ողջոյն ընդ ձեզ . և կրկնեալ զողջոյնն՝ ասէ ցնոսա որպէս առաքեաց զիս Հայր՝ և ես առաքեմ զձեզ . և զայս իբրև ասաց փրջեաց ՚ի նոսա և ասէ՝ առէք Հոգի սուրբ . եթէ զուրուք թողուցուք զմեզս, թողեալ լիցի, և եթէ զուրուք ունիցիք՝ կալեալ լիցի ” :

Տեսանէք՝ թէ որպէս զանազանին խոստմունքն ՚ի պարգևացս, զի անդ ասէ՝ թէ զոր կապեցես, և աստ թէ զորոց թողուցուք և ունիցիք :

Այլ պարասխանի :

Պարձեալ յորժամ հարցին աշակերտքն զՏէր յառակ սերմանացանին, թէ “ Ի՞նչ էր առակօք խօսիս ընդ նոսա . ասէ ցնոսա, ձեզ տուեալ է գիտել ըզ-

խորհուրդս արքայութեան երկնից » .
 և Ղուկաս ասէ թէ « Ամբարձ զաչս իւր
 յաշակերտսն և ասէ . երանի է աղքա-
 տացդ հոգւով, զի ձեր է արքայութիւն
 երկնից » : Արդ եթէ զանճառիցն և ըզ-
 ներքսագունից խորհրդոցն զիշխանու-
 թիւն ետ դիտել, որ իւր է և իւրոցն
 միայն՝ ըստ գրեցելումն թէ « խորհուրդ
 իմ ինձ՝ և իմոցն » , զիա՞րդ զարտաքին
 և որ դրանն՝ յաչաղէր տալ մեաասանի-
 ցըն : Այլ դարձեալ թէ զբովանդակ տէ-
 ըութիւն արքայութեանն ետ երկոտա-
 սանիցն , զիա՞րդ զփոքրագոյն իշխանու-
 թիւն դրանն ոչ հաւատայր ՚ի նոսա . և ե-
 թէ իւրոց է՝ որպէս և ետ , զիա՞րդ ոչ ու-
 նին իշխանութի յիւրեանց տէրութեն :
 Ահա ցուցաւ մեծագունիւն թէ ունին
 և զփոքրագոյնն : Այլ այժմ տեսցուք ,
 թէ զի՞նչ է բանալի արքայութեանն երկ-
 նից , և կամ ո՞ւմ ետ . զի մի և մեք վը-
 ըրիպեալ ՚ի ստուգութենէ բանին , ըստ
 այլոց ազգաց ընդունայն լիցի և մերն
 պարծանք :

Արդ՝ որպէս գտաք ՚ի Քրիստոսէ ա-
 ւանդեալ , առաջին բանալի է մկրտու-
 թիւնն , որպէս ասէ Յիսուս առ Նիկո-
 դիմոս « Այլ թէ ոք ոչ ծնցի վերստին ՚ի

ըրոյ և 'ի հոգւոյ, ոչ կարէ մտանել յար-
քայու թիւնն երկնից » որոյ և ետ իշ-
խանութիւն :

Ալ երկրորդ՝ կատարումն կամացն
Հօր, որպէս ասէ դարձեալ Տէր, « Աթէ
ոչ ամենայն, որ ասէ ցիս տէր տէր՝ մըտ-
ցէ յարքայութիւնն երկնից, այլ որ ա-
րասցէ զկամս Հօր իմոյ՝ որ յերկինս է » :

Ալ եթէ զի՛նչ են կամքն Հօր, նոյն
ինքն Որդին ուսուցանէ և ասէ « Ոչ են
կամք Հօր իմոյ եթէ կորիցէ մի ոք 'ի նու-
ցանէ », ըստ օրինակի գտելոյ ոչխարին
միոյ 'ի հարիւրիցն մոլորեցելոյն, և տայ
իշխանութիւն նոցա : Աթէ մեղիցէ ա-
սէ եղբայրն քո, եթ յանդիման կացո
զմեղս նորա դու միայն՝ եթէ լուիցէ
քեզ գալով 'ի խոստովանութիւն ապաշ-
խարութեանն, շահեցար զեղբայրն,
լոյծ 'ի ժամանակի զապաշխարութեան
կապանս, և ընդարձակեա նմա զեկեղե-
ցի և զկենարարն խորհուրդ, որ է առ
հաւատչեայ արքայութեանն երկնից .
իսկ եթէ յամառեալ հրաժարէ, յետ
կրկնակի և երրորդի յանդիմանութեան՝
եղիցի քեզ իբրև զհեթանոսս, կապեա
զնա արտաքոյ եկեղեցական խորհրդոցն,
որ և յերկինս զնոյն ունի կապանս ըստ

անսուտ բանին Տեառն :

Արդ՝ ընկալեալ երկոտասանիցն ըզկատարեալ իշխանութիւնս զայսոսիկ 'ի Քրիստոսէ և ոչ 'ի Պետրոսէ, և սփռեալք յիւրաքանչիւր վիճակս հաստատեցին աթոռս ինքեանց, անշարժ 'ի դրանց դըժոխոց ըստ բանին Տեառն, և բաշխեցին զիշխանութիւնս զայս աշակերտելոցն ձրի, որպէս և ընկալանն ըստ բանին Քրիստոսի : Այս այս յայտնի է յայսմանէ՝ որ այժմս կատարի յեկեղեցի խորհուրդ մկրտութեան, և խոստովանութեամբ և ապաշխարութեամբ մաքրութիւն 'ի Քրիստոսէ ազբիւրացեալ, ոչ 'ի ձեռն Պետրոսի 'ի մետասանան՝ և ապա նորօք 'ի մեզ, այլ 'ի Քրիստոսէ հասարակ յերկոտասանան, և 'ի ձեռն նոցա յիւրաքանչիւրոցն վիճակս, վասն որոյ ոչ կարօտանամք եկեղեցւոյն Հռովմայ, զի ունիմք զիշխողսն մեր 'ի Տեառնէ առաքեալ հաւասար ձեզ. արդ ո՞ւր են պարծանքն ձեր որ ոչ է 'ի կամացն Պետրոսի :

Բ Ը Ն Ե Ր Ր Ո Ր Դ

Ըսէ Լիկաթն՝ ոչ ասաց Տէրն, « Սի-
մոն դու երբեմն դարձցիս՝ և հաստա-
տեսցես զեղբարս քո » և զի՛նչ ևս գե-
րագոյն իշխանութիւն քան զայս :

Պատասխանի, արդ հաստատելն զոր
չէ՛ քան թէ յետ գլորման իրիք . և նախ
հարցանեմք զձեզ՝ եթէ մեր գլորեցան
մետասանքն յետ ընդունելոյն զհոգին
սուրբ , զի հաստատեաց զնոսա Պետ-
րոս . ցուցէք յառաքելական մատեանցն
և հաւանիմք ձեզ . և այժմ՝ որք ՚ի նո-
ցին սակի եմք այլ հարկեցուցանէք ըզ-
մեզ անզգամիլ բայց ոչ եղէց անզգամ՝
քանզի զարդարն խօսիմ . գիտեմք ըզ-
Պետրոս միայն գայթակղեալ յետ յա-
րութեան Տեառն , որպէս ասէ Պօղոս
առ Գաղատացիսն , եթէ « Ի՛նչ հեթա-
նոսս ուտէր անխտիր . իսկ իբրև եկին
սմանք առ ՚ի Յակոբայ՝ երկուցեալ զա-
տանէր մինչև կեղծաւորեցան ընդ նմա
և այլք , և Բառնաբաս անգամ . և իբ-
րև տեսի ասէ՝ թէ ոչ ուղիղ գնան ՚ի
ճշմարտութիւն աւետարանին , ասեմ
ցկեփաս առաջի ամենեցուն » :

Տեսանէք զգթելն Պետրոսի և զհաս-

տատելն 'ի Պողոսէ, և ոչ զայլն 'ի նմանէ :

Ո՞վ եղբարք, հաստատելն 'ի բազումս բաժանի յեղանակս . բայց մեք զերիսս զայս առնելով 'ի մէջ, տեսցուք թէ ըստ որո՞ւմ յեղանակի հաստատէ զմետասանս սրն Պետրոս ըստ բանի Տեառն : Արդ հաստատելն զայլս կամ ընդհանուր է, կամ մասնական . որ է իշխանական կամ յօրինակ լինել անձամբ և ոչ տիրելով՝ ըստ Պետրոսի . և զի հաւատարիմ բանս լիցի 'ի գրոց ցուցցուք :

Եւ արդ՝ ընդհանուր հաստատու թիւն է, յետ ընդհանուր գայթակղելոյն և թերութեանն 'ի հաւատոց . որպէս և գրէ ընդհանուր Պողոս առ Կորնթացիսն « Այսուհետեւ եղբարք իմ տիրելիք հաստատուն եղերուք, անշարժ կացէք . առաւել լերուք 'ի գործս Տեառն » . և դարձեալ՝ « Հսկեցէք հաստատուն կացէք 'ի հաւատս » :

Իսկ մասնաւոր, յորժամ մի ոք մեղիցէ . որպէս Կորնթացի մեղուցելոյն, զոր յետ ջերմեռանդն ապաշխարութեան հաստատէ զնա գրելով « Շատ է, ասէ՛ այնպիսուոյն պատուհասն այն, աղաչեմ զձեզ այսուհետեւ հաստատել 'ի նազսէրն », և կամ զոր առ Գաղատացիսն՝

« Եթէ որ բմբուհիցի յինչ և իցէ յան-
 ցանս, դուք որ հոգևորքդ էք, հաստա-
 տեցէ՛ք զայնպիսին հոգևով հեզու-թք » :
 Արդ ըստ երկուց յեղանակացս այսոցիկ,
 ոչ ուրեք ասի հաստատել Պետրոսի ըզ-
 մետասանօն, որ է իշխանական, և դուք
 ոչ կարէք ցուցանել՝ զի և ոչ յանցանք
 ինչ յիշատակի նոցա կամ ընդհանուր
 կամ մասնաւոր՝ յետ ընդունելոյն զՀո-
 գին սուրբ :

Այս ըստ երրորդ յեղանակիս ասեմք.
 որ է օրինակաւ և ոչ իշխանութեամբ.
 որպէս դարձեալ ասէ առ Քաղատացի-
 սն՝ թէ « Վասն սպրդողաց սուտ եղ-
 բարց՝ որք սպրդեցին մտանել գիտել
 զազատութիւնն մեր, զոր ունիմք ՚ի Քը-
 ռիստոս Յիսուս. զի զմեզ ծառայեցուս-
 ցեն, որոց ոչ առժամանակմի անօացաք
 հնազանդութեան. զի ճշմարտութիւն
 աւետարանին հաստատեսցի ՚ի ձեզ »,
 զոր արար և Պետրոս սպրդողաց սուտ
 եղբարցն, որք ասացին յայնմ գիշերի
 յորում յատեան ածաւ Տէրն, թէ « Եւ
 դու ՚ի նոցանէ՞ ես, նա ուրացաւ՝ թէ
 ոչ », և զի կամեցան իտպառ ծառայե-
 ցուցանել ուրացութեան, կրկնեցին և
 երեքկնեցին, և իսկոյն հաւ խօսեցաւ .

և յիշեալ զքանն Տեառն՝ ոչ առ ժամա-
նակ մի անսաց ուրացու թեան . ելեալ
ելաց դառնապէս և հաստատեաց զնու-
սա ՚ի բանէ աւետարանին՝ զոր ասաց
Տէր թէ « Սիմոն Սիմոն ահա սատանայ
խնդրեաց խարբալել զձեզ իբրև զցու-
րեան . այլ ես աղաչեցի վասն քո զի մի
պակասեցին հաւատք քո » :

Այլ պատասխանի :

Ասաց Տէր ցերկոտասանն, թէ « Յայ-
սըմ գիշերի դուք ամենեքեան գայթակ-
ղելոց էք յինէն . և Պետրոս յուրասա-
եղև և ասէ՝ թէ և ամենեքեան գայ-
թակղեսցին՝ սակայն ես ոչ . և նա ասէ,
և դու երկցս ուրացիս զիս », որպէս
և եղևն : Իսկ յորժամ տեսին մետասան-
քըն՝ եթէ դարձաւ Պետրոս, և ընկա-
լաւ զնա Տէր՝ որ զմեծագոյնն յանցեաւ,
հաստատեցան ՚ի հաւատոս թէ ընդու-
նի և զմեզ՝ անտես առնելով և զմերն
գայթակղութիւն : Ո՞վ եղբարք այսպէս
է հաստատելն Պետրոսի զեղբարսն՝ զոր
ասաց Տէր . և ոչ ըստ կարծեաց ձերոց
իշխանութեամբ :

Ասէ Տէր « Իու դարձցիս և հաստա-
տեսցես զեղբարս քո » . եղբարք կոչէ

նորա ըստ մտրմնոյ զԽորացէլ, զոր հաստատեաց բանիւ աւետարանին քարոզութեան, որոյ և վկայէ որ Քրիստոսիւ ըն խօսէր թէ “Ար յաջողեացն Պետրոսի յառաքելութիւն թրիատութեան յաջողեաց և ինձ ՚ի հեթանոսս” :

Այլ պատասխանի :

Նաև զաւազանաւն կոչեալ եղբարսն հաստատէ՝ և այն կրկնակի . նախ սոցաշխարութեան օրինակաւ, զի և մէք հաստատեալ եմք ՚ի հաւատս՝ թէ ըստ նմա և մէք գտանեմք զթողութիւն մեզաց ապաշխարութեամբ . երկրորդ ՚ի ձեռն ընդհանրական թղթոցն վարդապետութեան :

Այլ պատասխանի :

“Օ ՚ի դու ասէ Տէր դարձցիս և հաստատեսցես զեղբարս քս” զորս ցուցաք . և ոչ ասաց թէ հաստատեսցես զհաստատողսն սրբոց, վասն զի հաստատողք են և մետասանքն հանգոյն Պետրոսի որպէս վկայէ Պօղոս՝ որ Քրիստոսիւն խօսէր առ Եփեսացիսն թէ “Նա եզ զմանս մարգարէս և աւետարանիչս ՚ի հաստատութի սրբոց, ՚ի գործ պաշտա

ման, ՚ի շինուած մարմնոյն Քրիստոսի »:

Տեսանէք՝ թէ որպէս յամենայնի ան-
զիրկ պահէ զերկատասանն ՚ի հասարակ
իշխանութենէն, վասն որոյ և ոչ կարո-
տանամք այլում հաստատողի զմերն ու-
նելով հաստատողս :

ԲԸՆ ՉՈՐՐՈՐԴ

Եւ ՚ի Լիկաթն՝ վասն Պետրոսի ասէ
աւետարանագիրն թէ « Հայեցեալ ընդ
նա Յիսուսի՝ ասէ, դու կոչեսցիս Կե-
փաս », և Յովհաննէս յունարէն գրեալ
զաւետարանն՝ Կեփալ ասաց որ է գը-
լուխ, և նախախնամութիւն ոչ ետ թոյլ
Թարգմանել զբանս զայս յայլ լեզու,
այլ նովին բառիւն պահեաց ցայժմ, զի
ցուցցէ այսու գլուխ Պետրոս: Եւ ըզ-
կեփասն՝ որ Թարգմանի Պետրոս, սչ յի-
շէր :

Պատասխանի. և արդ ս՛վ դուք,
պարծանքս այս յոյժ է փցուն, և անտա-
րակոյս: Նախ՝ զի որ գրեացն նա ասաց
թէ « ՚Իու կոչեսցիս Կեփաս՝ և Թարգմա-
նեաց զնա Պետրոս », և ՚ի Յունաց աւե-
տարանն ցայժմ այսպէս է գրեալ. զի

ընթերցեալ այսպէս լուար, և 'ի հմտա-
գունից արանց հարցեալ այսպէս ասա-
ցին. որպէս և գրեալն էր :

ԼՂԼ պապասխանի :

Եւ արդ զի այսպէս է գրեալ, ասա-
ցէք յազագս որոց պիտոյից՝ ասաց ըզ-
կեփալն, թէ թարգմանի Պետրոս. Պետ-
րոսն յունարէն է և այս ոչ էր բնաւ
պիտոյ. իսկ եթէ ասիցէք, թէ կեփալ
'ի կեփալ ասաց թարգմանել, նա և այս
անմտութիւն՝ զգլուխ 'ի գլուխ թարգ-
մանեղն 'ի մի և 'ի նոյն բարբառ, զոր
մեզ պարտ էր առնել զայս՝ որ թարգ-
մանեցաք 'ի մեր լեզուս :

Եւ դարձեալ՝ եթէ Յովհաննէս 'ի
Տեառնէ գլուխ լուաւ և քար թարգ-
մանեաց, այս ոչ միայն յիմարութիւն
այլ և ստութիւն և թերութիւն մու-
ծանէ յաւետարանն, և անհաստատ ցու-
ցանէ զբոլորն՝ զոր մի լիցի :

Իսկ եթէ զոր լուաւն Աեփաս Եբրայե-
ցերէն, և ասաց թէ՝ որ թարգմանի յու-
նարէն Պետրոս որպէս և գրեալ է 'ի նո-
ցայն և 'ի ձերդ՝ և յամենայն ազգաց ա-
ւետարանսն. ընդէր զըսարտէք զճճմար-
տութիւնն, և ասացիք նախախնամու-

Թեանն պահել զբանն , զինչ առաւել
լուծիւն ունի յունարէն կեփալն՝ ՚ի վե-
րայ գլխոյն հայերէն . ո՞չ զմի և զնոյն
նշանակեն իր . ահա ընդվայր մտածուի :

Իսկ թէպէտ և տամք ըստ ձեզ գը-
լուխ գոլ ասացեալ , ասացէք ո՞ւմ է
գլուխ . զի ամենայն գլուխ անձին է գը-
լուխ , և որ ասացն՝ ըստ ձեզ զանձն ոչ
ցուցանէ , որպէս և յարածեա՛ ասելն
զոչխարսն . և զի ոչ է անձն՝ ապա և ոչ
գլուխ , որպէս ձեզ թուի . և ընդէր
ստուերամարտ լինիք զօդ հարկանելով
կարծէք յաղթիւ լինել զոր ոչն տեսէք :

ԲԸՆ ՀԻՆԳԵՐՈՐԴ

Ասէ Լիկաթն , ընդ Պետրոս միայն
ասաց Տէր՝ թէ “ Ըրածեա՛ զոչխարս
իմ ” . և զայս անլուծանելի ասեն գոլ
նշանակ իշխանութեան :

Պատասխանի . նախ տեսցուք թէ այլ
բան համազօր այսմ բանի գո՞յ յաւետա-
րանսն՝ թէ ոչ . և թէ այլ ի՞նչ նշանա-
կէ արածելն քան զաշակերտելն . և զի
ոչ այլ ինչ ցուցանէ՝ վկայէ Եղեկիէլ որ-
պէս ՚ի գիմաց Աստուծոյ , թէպէտ և

ի հակառակէն . “ Այսպէս ասէ Տէր՝
ո՛ հովիւք Իսրայէլի , միթէ հովիւք զան-
ձի՛նս արածեն , ո՛չ հովիւք զոչխարսն ա-
րածեն , արդ ահաւադիկ զգէրսն զէ-
նէք՝ զասրն զգենուք և ուտէք զկաթնն ,
և զխաշինս իմ ոչ արածէք ” . որպէս և
այժմ , և ոչ որ է՝ որ յանդիմանէ : Արդ
եթէ յայտ եղև թէ նոյն է արածելն և
աշակերտելն , ապա ոչ է ատեանել մեզ
միայն զբառիցն զանազանութիւն , այլ
զմտացն գիտաւորութիւն . քանզի սովու-
րութիւն է Փրկչին զմի և զնոյն իր բազ-
մազան բառիւք նշանակել՝ որպէս զար-
քայութիւն երկնից ուռկանիւ և գան-
ձիւ և մանանեխիւ , այսպէս և զբա-
րոզութիւն աւետարանին , զոր աստ ա-
րածեա զոչխարսն ասաց՝ այլուր հուն-
ձըս կոչեաց , և հարսանեաց նմանեցոյց
պատրաստութեան . և ՚ի Հօրէ և յիւր-
մէ ասաց հանել և առաքել զմշակսն և
զճառայսն . և ոչ մշակ մի և ճառայ որ-
պէս ձեզդ թուի , այլ հասարակ զերկո-
տասանսն . ժողովել զորայն և ամել ՚ի
հրապարակացն զկուրացեալսն յիսկա-
պէսն լուսոյ՝ ՚ի լոյս գիտութեան ճըշ-
մարտութեան որպէս և էին կոչեցեալ
լոյս աշխարհի :

Այլ պարտականի :

Դարձեալ տեսցուք, թէ զինչ արօտըն իցէ. զի մի զհասանուտս զայս կարծեսցուք և զգալապէս զարածելն. և եթէ այլ ո՞ք իցէ յայսմ արօտի արածող՝ թէ Պետրոս միայն : Եւ արդ՝ է արօտն ըստ ինքեան կերակուր. և եթէ կերակուր է, յայտ է՝ թէ զանազանեալ է ըստ կերողացն. որպէս անբանիցն է զգալին խոտ՝ այսպէս և բանաւորացս բանն Աստուծոյ և իմաստութիւնն. որպէս աւսէ սուրբն Դաւիթ յեօթանասներորդ եօթներորդ Սաղմոսին, թէ « Հավուէր զԻսրայէլ, և արածէր զնոսա իմաստութեամբ սրտի՝ և անմեղութեամբ ձեռաց առաջնորդէր նոցա », և Տէրն՝ թէ « Ոչ հացիւ միայն կեցցէ մարդ, այլ ամենայն բանիւն Աստուծոյ » : Արդ՝ զբանն իւր բանն Աստուած ոչ միայն Պետրոսի ետ, այլ և ընկերացն նորահասարակ ՚ի Գալիլեա՝ ուր ժամադիրն եղև տեսանել զնոսա. որպէս և գրեալն է, իբրև ետես զնոսա՝ ասէ « Գնացէք այսուհետև աշակերտեցէք զամենայն հեթանոսս. ուսուցէք նոցա զբանն իմ զամենայն՝ զոր ինչ պատուիրեցի ձեզ », և թէ « Հոգին սուրբ եկեալ ու

սուսցէ և յիշեցուսցէ ձեզ զբանն իմ” :
Եւ զիմաստութիւն ետ և ասէ ցհրէայ-
սըն՝ “ Լ՛ռաքեցից ՚ի ձեզ իմաստունս զու-
րըս սպանանիցէք : Եւ Պօղոս, թէ “ Ս՛եք
քարոզեսցուք զևաչելեալն Քրիստոս՝ որ
պէս հրէիցն գայթակղութիւն, այսպէս
նոցին կոչեցելոցն՝ զՔրիստոս Աստուծոյ
զօրութիւն և Աստուծոյ իմաստութի ” :
Եւ զի արօտ է քարոզութիւն, նոյն ինքն
ցուցանէ Պօղոս՝ “ Տղայաբարոյիցն կա-
թըն ասէ Չամբեցի, իսկ կրթեցելոցն
ճաշակելեօք հաստատուն կերակուր ” :

Տեսանէք, թէ որպէս հասարակ ցու-
ցան արածող . զի զոր անդ արօտ ասաց
Քրիստոս զաւետարանն՝ որ Քրիստոսիւն
խօսէր, Չամբումն և կերակուր ասէ :

Եւլ պարտախանի :

Ո՛վ տեարք, ահա՛ և ոչ յայսմ մասին
զըկէ Տէրն զմետասանն . զի ասաց թէ
“ Լ՛րածեա՛ զոչխարսն ” և ոչ զհովիւսն,
վասն զի հովիւք են և այլ համակարգքն
նորա աշակերտքն և արածող նման նը-
մա, վկայէ Պօղոս առ Եփեսացիսն և ա-
սէ՝ “ Նա եդ զոմանս աւետարանիչս, զու-
մանս հովիւս և վարդապետս ” :

Տեսանէք՝ թէ որպէս յայտնեաց թէ

ոչ այլ ինչ է հովուելն և արածելն , քան
 զվարդապետելն , և անզանազան եցոյց
 որպէս յամենայնի , և յայսմ զերկուտա
 սանսն . իսկ յո՞ր արօտ ստէք արածել
 Պետրոսի զբանաւոր ոչխարսն Քրիստո
 սի , ցուցէք զբարձրագոյնն քան զմե
 տասանիցն որով պարծիրք . իսկ եթէ
 ոչ կարէք ցուցանել այլ՝ քանզի ոչ գոյ
 այլ աւետարան , գուք ինքնին վկայէք
 թէ մի և նոյն են իշխանութեամբ : Կնքէ
 անխախտելի որդին Աստուծոյ Հարբ ըզ
 միութիւն իշխանութեան նոցա , ասե
 լով “ Հայր եղիցին և սօքա մի , որպէս
 և մեք մի եմք ” : Արդ եթէ ըստ Հօր և
 Ռրդւոյ հաւասար ունին զպետութիւն
 երկատասանքն ըստ Տեառն բանին , յոյժ
 է յանդգնութիւն մուծանել 'ի նոսա
 առաւելութիւն և նուազութիւն . զի
 այն 'ի Հայր և յորդի վերաբերի . և զա
 րիոսին աստանան մոլութիւն զանխա
 բար սյնսլիսուոյն խորհողքն :

Այլ պատասխանի :

Իւր զի ասաց , արածեա՛ զոչխարս իմ .
 հաւատայ յատուկ զառաքելութի թըւ
 փատութեանն Պետրոսի , իւր կոչելով
 ոչխարս . ըստ այնմ թէ “ Աչ ուրեք ա

ուտքեցայ, եթէ ոչ առ ոչխարս կորուսեալս տանն Իսրայէլի», և թէ « յիւրսն եկն ». որպէս Պօղոս վկայէ առ Գաղատացիս զյատկու թին, թէ « Իբրև տեսին կարծեալ սիւնքն՝ թէ հաւատացեալ էինձ աւետարանն անթլփատու թէ, որպէս Պետրոսի թլփատու թէն ». և արդ ո՛ւր հաւատացաւ թէ ոչ յայսմ վայրի, ցուցէք՝ զի ոչ ստէ վկայն ճշմարիտ :

Իսկ եթէ ասիցէք՝ թէ հեթանոսք ոչ են ոչխարք Քրիստոսի. թէ այսպէս իցէ, ապա զո՞վ արած են մետասանքն. աւեմք թէ՛ այո՛ և հեթանոսք. զի զնոսա կոչեաց ասելով «Նա և այլ ևս ոչխարք են իմ, որ ոչ են յայսմ գաւթէ, և զայն ևս պարտ է ինձ ածել այսր. և եղիցին մի հօտ և մի հովիւ ». և Պօղոս վկայէ թէ « Չիք խաիր ոչ հրէի և ոչ հեթանոսի. զի ամենեքին դուք մի էք ՚ի Քրիստոս Յիսուս » : Տեսանէք՝ թէ որպէս ցուցաւ ըստ միութեան ոչխարացն՝ մի իշխանութիւն արածողացն :

ԲԱՆ ՎԵՑԵՐՈՐԴ

Ասէ Լիկաթն, ո՞չ և այս մեծութի
է նորա՝ զի վմահն նշանակեաց Քրիս-
տոս . ասէ « Զորժամ ծերասցիս՝ ձեռս
ի վեր կալցես՝ և այլք ամցեն քեզ գօ-
տի, և տանիցեն զքեզ՝ ուր ոչն կամի-
ցիս . նշանակեալ թէ որով մահու փա-
ռաւոր առնիցէ զԱստուած » :

Պատասխանի . նախ զի յաղագս եր-
կոտասանիցն իշխանութեան անզանազու-
նութեան է առաջարկութիւնս մեր, և
ոչ մահու որպիսութեան . զի մահն ոչ
եթէ հաստատութիւն տէրութեան է,
այլ ՚ի բաց բարձումն կենաց և իշխա-
նութեան . զի յետ ելիցն ոչ ումեք իշ-
խէ, և ոչինչ ունի դիտաւորութիւն այս
ի բանս մեր :

Այլ պատասխանի :

Իսկ եթէ մեծութիւն թուի ձեզ .
ասպա ոչ ինչ նուազ երեւին յայսմ մասին
և մետասանքն վասն նոյն գունակ նշա-
նակելոյն և զնոցայն մահ՝ ըստ գրեցե-
լումն, թէ « Ահաւասիկ ես առաքեմ
զձեզ իբրև զոչխարս ՚ի մէջ գայլոց » .
և թէ՛ « Վասնեսցեն զձեզ յատեանս

և 'ի յողովուրդս տանջիցեն և 'ի խաչ
հանիցեն զձեզ՝ և սպանանիցեն », և թէ
« Որ սպանանիցեն զձեզ՝ համարիցին
պաշտօն մատուցանել Աստուծոյ », և թէ
« Ս'ի երկնչիք յայնցանէ որ սպանանեն
զմարմին » : Եւ արդ զի՞նչ ասէք, մի թէ
ոչ են մահու նշանակք այսոքիկ : Եւ ոչ
վասն տանջանայն զանազանութեան ա
սէ՝ զորով փառաւորելն զԱստուած . զի
բազմազանքն զմի և զնոյն ունին կա
տարած , զմարմնոյն միայն մեռանիլն ,
որպէս ասաց Տէր : Եւ վասն մահուն
որպիսութեան , որ է ելք՝ քանզի յեր
կուս բաժանի մահ մարդոյ . 'ի չար և 'ի
պատուական . որպէս ասէ մարգարէն
Դաւիթ յերեսներորդ երրորդ Սաղմո
սին , թէ « Մահ մեղաւորին չար է » ,
և 'ի հարիւրերորդ տասներորդ հինգե
րորդ Սաղմոսին , թէ « Պատուական է
առաջի Տեառն մահ սրբոց իւրոց » . վա
սն որոյ 'ի բաց հանէ 'ի նմանէ զչար
մահուն երկիւղ և ասէ , պատուական
մահուամբն մեռանիլ որով փառաւորի
Աստուած : Եւ զի յատուկ ասէ ցՊետ
րոս՝ հաստատէ զնա վասն դիւրափոփոխ
դողոյ բարուցն . որպէս 'ի ժամ չարչարա
նայն՝ եթէ 'ի խնդրելն սատանայի , ևս

աղաչեցի վասն քո, և զայս ոչ որ յան,
 գրգնի ասել, թէ մետասանքն ոչ փա-
 ռաւորեցին զԱստուած մահուամբ, և
 զի մի են եւք նոցա՝ միապէս և զմրցա-
 նակն խոստացաւ նոցա Տէրն, « Ի ուք
 ասէ, որ եկիք զկնի իմ՝ ՚ի միւսանդամ՝
 գալստեանն յորժամ նսոցիմ յաթոռ-
 փառաց իմոց, նսոջիք և դուք յերկոտա-
 սան աթոռս դատել զԽարայէլ » . որ է
 բանս այս զօդ կատարման անդանազու
 նութեան նոցա, որպէս անդ՝ ըստ այ-
 նրմ և աստ, և եթէ ոչ անդ՝ և ոչ աստ,
 և բոլորն բարձաւ ձերդ իշխանութիւն
 ստելով զճշմարտութիւնն :

ԲՆՆ ԵՕԹՆԵՐՈՐԴ

Ըսէ Լիկաթն, ոչ տհա մեծի իշխա-
 նութեան ցոյցք է որ սլատմի ՚ի գործս
 առաքելոցն, թէ « Յաւուրոն յայնոսիկ
 յարուցեալ Պետրոս ՚ի մէջ եղբարցն,
 ասէ, անք եղբարք պարտ է կատարել
 գրոյն վասն Յուդայի, որ հասեալ էր
 նմա վիճակ պաշտամանս մեր, սա ու-
 ռուցեալ հերձաւ, արդ պարտ է յա-
 ըանցս որ ընդ մեզս են, վկայ յարու-

Թեանն Քրիստոսի լինել ընդ մեզ ։

Պատասխանի . բարէ իմաստութեոյ
ձեռ . զի զկատարելապէս հաւասարու
Թեան զյայտնութիւնն ոչ իմանայք , զի
զխրատն տալ իբր 'ի մեծութիւն յիշէք
զնորա , և զոչն կարել ձեռնադրել յաս
տիճան երկոսասանիցն զոր վասն համա
կարգութեանն՝ ոչ ածէք զմտաւ : Օյի
այս է իշխանին յառաջ ածել զընտրեալ
սըն՝ յորոց տուեալն է 'ի Տեառնէ ընդ
իւրով իշխանութեամբ , և ապա իշ
խսել իւրոց վիճակելոցն . զոր ոչ ընկա
լեալ 'ի վերայ մետասանիցն , որպէս ին
քնն ցուցանէ յԱստուած վերաբերելով
զընտրութիւնն ըստ ինքեանց 'ի Տեառ
նէ , և 'ի Հոգին սուրբ զզօրութիւն ըն
դունելութեան . այլ և զայս ոչ կարէք
ասել՝ Թէ ոչ ունէր իշխանութիւն ձեռ
նադրութեան , զի Թէ ոչ Պետրոս՝ և ո
այլ ոք . բայց որոց տուաւն՝ զոր այժմի
ունիք : Իսկ եթէ ասիցէք անկատար գոլ
Թէպէտ յետ յարութեանն վասն չև ևս
ընդունելոյ զՀոգին սուրբ , ապա զի
պարծիք անկատարիւքն իբր կատարե
լովք . իսկ եթէ կատարեալ՝ որպէս և
էրն , ընդէր ոչ խոստովանիք զհաւասա
րութիւնն :

Այլ պատասխանի :

Դարձեալ հարցանեմք վասն խրատուն . ասացէք՝ եթէ զի՞նչ նշանակէ իշխանութեան , որ և նուաստագունիցն պատահէ առ յոյժ բարձրագոյնսն , որպէս և ունիմք զսոյն ՚ի գրոց ցուցանել յեւրոյն : Արդ յորժամ եկն Յովթոր աներըն Մովսէսի առ Մովսէս՝ և ետես ըզտառապանս նորա ՚ի բազում հոգոցն որ յամբոխէն , ասէ ցՄովսէս . « Ոչ է ուղիղ բանդ՝ զոր առնես , անհնարին տանջանք է քեզ և ժողովրդեանդ . ոչ կարես միայն առնել՝ ես տաց քեզ խրատ . լէ՛ր դու ժողովրդեանդ առ ՚ի Աստուծոյ , և տարցես զբանս դոցա առ Աստուած . և դիցես դոցա վկայութիւն զհրամանացն Աստուծոյ և զպատուիրանաց նորա . ընտրեա՛ արս Աստուածապաշտս որ հեռի իցեն յամբարտաւանութենէ , և կացուցես հազարապետս մինչև ցտասնապետս , և թեթևացի ՚ի քէն և այլ ևս յորովս : Եւ լուաւ Մովսէս ձայնի աներոյն , և արար որպէս ասաց նմա » : Արդ մե՞ծ ասես զՅովթոր քան զՄովսէս զաստուած կոչեցեալն ՚ի Տեառնէ . զի և տարերբ ոչ ելանէին ընդ հրամանս նորա . և զի՞նչ է զայս ասել առ ծայրագոյնն իմաստութիւն՝ որ և եղևն :

Ի գրոց խառոյն :

“ Եւ Տէր ցՄովսէս , մինչև ցերբ
բարկացուցանէ զիս ժողովուրդդ . թոյլ
տուր ինձ , զի հարից զդոսա մահուամբ ,
և ասէ Մովսէս . Տէր՝ իսկ արդ լուիցեն
Եգիպտացիքն և ամենայն ժողովուրդ
երկրիս , թէ դու Տէր ՚ի ժողովրդեանս
յայտիկ ես . և սեամբ ամպոյ երթաս
դու առաջի դոցա ՚ի տուէ , և սեամբ
հրոյ ՚ի դիշերի , և սատակեսցես զժո-
ղովուրդս զայս իբրև զայր մի՝ խօսես
ցին ազգք , որ լուիցեն զքէն և ասիցեն ,
վասն զի ոչ կարէր Տէր տանել զժողո-
վուրդն զայն յերկիրն՝ զոր երդուաւ
նոցա յանապատին . և ասէ Մովսէս , արդ
բարձրացի ձեռն քո Տէր , թոյլ զմեզս
անցա ըստ մեծի ողորմութեան քում ,
որպէս ներեցեր դոցա Եգիպտոսէ մին-
չև ցայժմ . և ասէ Տէր ցՄովսէս՝ ներե-
ցից դոցա ըստ բանի քում ” : Եւ արդ
զինչ ասէք առ այս , միթէ մեծ ոմն է
Մովսէս քան զԱստուած , զի ետ Տեառն
զխրատս զայս , յորոց զբազու մն կարճե-
ցաք վասն յերկարութե : Եւ հա անվա-
ւեր ցուցաւ և այս , և այն կրկնակի :

Համառօտ պատասխանի չարիցն բանից 'ի յեօթանցն՝ զորս
 ատայ Տէր առանձնակի ցՊետրոս : զորս կարծեն մեծու
 թիւն գող նմա , և նախա ինքեանց՝ հռովմայեցիք . զի ե
 բեքն այլ ոչ տան զօրութիւն կարծեաց նոցա՝ թէպէտ և
 ոչ այսօքիկ : Եւ համեմատութիւն ընդդէմ՝ նոցին 'ի նուառ
 տացուցիչ ասացելոցն :

Իսկ եթէ տսիցեն հռովմայեցիքն ,
 եթէ ոչ ետ կրկին իշխանութիւն Պետ
 ռոսի Քրիստոս՝ ընդէր զմեծամեծ բանս
 զայսօքիկ բաց յընկերաց նորա ասէ ցնա :

Ըն որս ասացուք նախ՝ թէ ոչ նու
 բոգ ինչ ետ պարգևս նմա , սյլ 'ի տուե
 ցելոցն հասարակաց՝ կրկնեաց առ նա .
 և այսօքիկ որք միտս ունին , նուաստու
 թեան և անհաստատ լինելոյ են ցոյցք
 նմա՝ և ոչ կրկին իշխանութեան և վե
 հագուհութեան մետասանիցն , վասն
 անխախտ կալոյ մնալոյ 'ի տուեալ իշխա
 նութիւնն նոցա 'ի Տեառնէ :

Իսկ դուք բարձրացուցանողօքդ պար
 ծիր , և զնուաստացուցանողօքն զանց առ
 նէք , և զի ասաց թէ “ Դու ես վէմ ” և
 զայլն զմտաւ ամէք . և զոր ասաց թէ
 “ ստատանայ իմ ես ” և զնմանն սորա ոչ
 յիշէք , զի որ ասացն թէ “ դու ես վէմ ,
 և յայդը վերայ շինեցից զեկեղեցի իմ ”

նա ասաց թէ “ ստուանայ ես իմ և
 գայթակղութիւն ես իմ ” . և որ հրա-
 մայեաց թէ “ Տաց քեզ զփականս ար-
 քայութեան երկնից ” նոյն ինքն բարբա-
 ռեցաւ թէ “ ոչ խորհիս զԱստուծոյսն ”
 այսինքն զարքայութեանն : Եւ որ խո-
 սեցաւ առ նա թէ “ գարձցիս և հաս-
 տատեսցես զեղբարս քո ” նա կոչեաց
 զնա “ թերահաւատ և երկմիտ ” : Եւ
 որ մահայաւել երիցս թէ “ Արածեա՛
 զոչխարս իմ ” , նա գուշակեաց զնմանէ
 թէ “ երիցս ուրասցիս զիս ” :


Տեսանէք՝ թէ որպէս համեմատեցան
 միմեանց կողմանքն երկոքեան , և այսո-
 քիկ ասացան ՚ի նախախնամութենէն
 Աստուծոյ . զի մեծամեծքն դեռևս են
 ՚ի հաստատութիւն վերստին՝ և ՚ի նորո-
 գումն նուաստացուցանողացն , և ՚ի հա-
 տումն երկուց մեծ օխտից՝ բարձրայօ-
 նութեան և գայթակղութեան . զի դուք
 մի մեծովքն ամբարտաւանեսջիք , որպէս
 կրիդ ՚ի ձեզ՝ և այլք մի ներհակօք գայ-
 թակղեալք նուաստ համարեսցին զՊետ-
 րոս քան զընկերսն :

Իսկ եթէ ասիցէք թէ , Աստուած
 անզեղջ է ՚ի բարետրութիւն , և անյի-
 շտչար ՚ի սխալանս ՚ի զղջանալն . այս՛

զի որ ոչ հաւատայ այսմ, եղիցի ունայն
'ի լաւագոյն զօրութենէն. այլ եթէ ոչ
էր արժան յիշել զնուաստագոյնսն յայ-
սրմ վայրի՝ և ոչ արժան ընթեռնուլ
յաւետարանսն :

Արդ հարկ է ձեզ կամ տրոհարկել
ոչ ընթեռնուլ յեկեղեցի և մեղադրել
Հոգւոյն սրբոյ խօսողին զբանսս զայսու-
սիկ՝ և կամ արտաքս հանել 'ի գրոցն : Իսկ
եթէ այս անհնար է, զի Հոգին սուրբ գը-
րով ետ արձանացուցանել մշտնջենաւոր
յարակայութեամբ . ապա հարկ է ոչ
զանց առնել որպէս զմեծամեծօքն՝ սոյն-
պէս և զփոքումբն ըստ հասարակ գը-
րեցելումն : Իսկ եթէ փոքունքն ոչ են
'ի պատճառս նուաստութեան, և ոչ մե-
ծամեծքն 'ի պատճառս բարձրայօնու-
թեան . և եթէ ոչ այն, և ոչ այս՝ ապա
յերկուցն է մեզ հրաժարելի յախտիցն
ասացելոց, և զմիջինն ընթանալ պողո-
տայ անխոտոր՝ և երկուսասանական իշ-
խանութեամբն միայն պատուել զՊետ-
րոս . վասն զի այս իսկ են կամք երանե-
լեացն դասու՝ որ յամենայն ուրէք հա-
սարակութեան աշակերտեցան, ըստ այ-
նրմ թէ « Ամենեքին դուք եղբարք էք »
և թէ « Հայր եղիցին և սրբա մի, որպէս

և մեք մի եմք ” և մեզ զնոյն ուսուցին ,
Թէ “ Յոր կոչեցարուքն՝ ՚ի նմին կաց-
ջիք ” . և Թէ “ Յամենայնի որ է ՚ի ձեզ
մի ինչ առաւել խորհել քան զարժանն ,
այլ խորհիլ ՚ի զգաստանալ ” . ՚ի հաւա-
տացեալսն իւրաքանչիւր ումեք ՚ի Քրիս-
տոսէ Աստուծոյ մերմէ . որում ընդ Հօր
և ամենասուրբ Հոգւոյն փառք՝ իշխա-
նութիւն և սլատիւ , այժմ և միշտ
և յաւիտեանս յաւիտենից . ամէն :



ՎԿԼՅՈՒԹԻՒՆԻ

Յողագոս անդանաղանութեան առ միմեանս երկուտասան
առաքելոյն . և հասարակ ընդունելոյ 'ի Քրիստոսէ զիշ-
խանութիւն , և ինքնագլուխ գոլոյ իւրաքանչիւրոյն բնդ-
գէմ հռովմայեցւոցն վկայութեանց՝ զորս առանձինն
առնուն 'ի Պետրոս :

Առ ի հասարակ ասաց Քրիստոս ,
“ Դուք էք աղ երկրի ” առ 'ի բառնալ
զանհամութիւնս նոցա :

Բ . “ Եւ դուք էք լոյս աշխարհի ” ան-
ծածկելի առ 'ի փարատել զխաւարն ան-
դիտութեան 'ի բոլոր տանէս :

Գ . “ Եւ զերկուտասանսն կոչեցեալ առ-
ինքն , ետ նոցա զօրութիւն և իշխանու-
թիւն 'ի վերայ ամենայն դիւսոց և ցա-
ւոյ . և առաքեաց քարոզել զարքայու-
թիւնն Աստուծոյ ” :

Դ . Եւ նոցա միայն ասէ Յիսուս “ Ըմէն
ասեմ ձեզ . զի դուք որք եկիք զինի իմ ,
'ի միւսանգամ գալստեան իմում՝ յոր-
ժամ նստցի Արդի մարդոյ յաթոռ փա-
ռաց իւրոց , նստջիք և դուք յերկուտա-
սան աթոռս դատել զերկուտասան ազգ-
սըն Իսրայէլի ” :

Տեսանէք՝ թէ որպէս ընդ իւր ցուցանէ անզանազան զնոսա առ միմեանս . որպէս աստ՝ և անդ . և որոշէ զնոսա յայլոց զհետ ընթացելոցն , թէ և նորաստէ հարիւրապատիկ առնուն և ըզյաւ խտենական կեանսն . բայց ակտոռ ոչ խոստանայ վասն անհամեմատուէ նոցա .

Ե . Եւ նոցա հաւասար ասէ “ Չեզտուեալ է գիտել զխորհուրդ արքայութեան երկնից ” . զի՞նչ մեծագոյն իշխանութիւն ասիցէ որ գոլ քան զայս , և զայս՝ որով նորա պարծին մեծ գոլ , նամենեցուն ետ :

Զ . “ Ըմէն ասեմ ձեզ , զի զոր կապիցէք յերկրի՝ եղիցի կապեալ յերկինս . և զոր արձակիցէք յերկրի՝ եղիցի արձակեալ յերկինս ” :

Է . “ Եւ մատուցեալ Յիսուս խօսեցաւ ընդ նոսա՝ և ասէ , տուաւ ինձ ամենայն իշխանութիւն յերկինս և յերկրի . որպէս առաքեաց զիս Հայր՝ և ես առաքեմ զձեզ . գնացէք այսուհետև աշակերտեցէք զամենայն հեթանոսս՝ մրկրրտեցէք զնոսա յանուն Հոր և Արդւոյ և Հոգւոյն սրբոյ . ուսուցէք նոցա զամենայն զոր ինչ պատուիրեցի ձեզ , և ես ընդ ձեզ եմ մինչև ՚ի կատարած աշխարհ .

հի » . և այս բարձրագոյն և աններհակ վկայութիւն :

Ը . « Եւ եհան զնոսա 'ի Բեթանիա և ամբարձեալ զձեռս իւր՝ օրհնեաց ըզնոսա » :

Տեսանէք զի ինքն ձեռնադրեաց ըզնոսա , և եցոյց զինքն միայն նոցա իշխօղ՝ և ոչ զՊետրոս կամ զայլ ոք :

Թ . Եւ թէ՛ « Ուր եսն իցեմ , և դուք անդ իցէք , և ուր երթամն գիտիցէք . և զճանապարհն գիտիցէք » :

Ժ . Եւ թէ՛ « 'Ի ուք տեսանէք զիս , զի ես կենդանի եմ , և դուք կենդանի լինելոց էք » :

ԺԱ . « 'Իտասջիք զի ես 'ի Հօր իմում , և դուք յիս՝ և ես 'ի ձեզ » . արդ ոք զանհամեմատս զայս իշխանութիւն գիտութեան՝ բնակութեան արքայութեանն ետ նոցա հասարակ , զիարդ 'ի փոքունս առաւել կամ նուազ առնէր զնոսա :

ԺԲ . « Եւ զձեզ կոչեցի բարեկամս , զի զամենայն զոր լուայ 'ի Հօրէ իմմէ՝ ծանուցի ձեզ » : Եւրդ եթէ զամենայն հասարակ ծանոյց երկոտասանիցն , ապա Պետրոսի միայն զինչ ծանոյց . զի զանտանելին ոչ ումեք ծանուցանէ վասն յոյժ խնամոցն :

ժԳ. Եւ թէ՛ « Եւ ընտրեցի զձեզ՝ և եղի զձեզ, զի դուք պողարբեր լինիցիք, և պտուղն ձեր կացցէ » նմանապէս աւսէ կեալ քարողութեան նոցա :

ժԴ. Եւ թէ՛ « Հայր սուրբ պահեա՛ զնոսա յանուն քո որով ետուրն ինձ, զի եղիցին մի՛ որպէս և մեք մի եմք, և ՚ի վերայ բերէ, թէ քո բանդ ճշմարտութիւն է » :

ժԵ. « Որպէս զիս առաքեցեր յաշխարհ և ես առաքեցի զնոսա յաշխարհ, » ամենն ին՝ աններհակ եցոյց զմի իշխանութիւնն, զի նախ միացոյց Հարբ՝ և ապա առաքեաց յաշխարհ, և կարկեաց զբերանս զանազանողացն :

ժԶ. Եւ թէ՛ « Եւ դ գիտացին զի զամենայն ինչ զոր ետուրն ինձ՝ ետու նոցա . և նոքա ընկալան, և ետու նոցա զբանն քո », կրկնեաց վասն առաւել հաստատութեան :

ժԷ. « Եւ զայս իբրև ասաց, փչեաց ՚ի նոսա . և ասէ, առէք Հոգի սուրբ . եթէ զուրուք թողուցուք զմեզս՝ թուղեալ լիցի, և եթէ զուրուք ունիցիք, կալեալ լիցի », ըստ հասարակ ընդունելոյն զՀոգին՝ ետ և զիշխանութիւնն, միապէս պատուիրեաց զորութիւն ըն

դունել 'ի բարձանց՝ միորակ զհրեղենն
 ընկալան զլեզուսն . և կնքէ անլուծանե-
 լի կնքով և անսպրդելի 'ի ներհակաց
 զխորհուրդ բանիս Հարբ՝ զի ասէ . « Եւ
 ես զփառսն զոր ետուր ինձ՝ ետուր նոցա .
 զի եղիցին մի՝ որպէս և մեք մի եմք .
 ես 'ի նոսա՝ և դու յիս , զի եղիցին կա-
 տարեալք 'ի մի » : Ըրդ զո՞ր փառս ետ
 Պետրոսի արտաքոյ այսր . զի այլն արտա-
 քոյ է 'ի նմանութենէ Հօր և Որդւոյ
 միութենէն . և այս ոչ է բարեկամու-
 թիւն Պետրոսի՝ այլ ներհակն նորին . մի
 գուցէ լսիցեմք 'ի Պետրոսէ , թէ որ
 զեղբարս իմ՝ նուաստացուցանէ՝ նուա-
 տացուցանէ և զիս . և զի այսպէս է 'ի
 հաւասարսն , որպէս և Քրիստոս հրա-
 մայէ թէ « Որ ուրանայ զՈրդին և ըզ-
 Հայր ուրացեալ է » , և Տէրն ասէ թէ
 « Որ զձեզ պատուէ՝ զիս պատուէ » , ըզ-
 ձեզ ասէ՝ և ոչ զՊետրոս միայն . նոյնպէս
 և հակառակն սորին : Ըրդ որովհետև
 այսքան շուրջ զմեօք մածեալ ունիմք
 զբազմութիւն վկայութեանցս՝ 'ի բաց
 ընկեսցուք զամբարտաւանութիւն , որ
 է մայր խռովութեան , և զհաւասա-
 րութիւն տացուք նոցա ըստ Քրիստոսի ,
 և մի անարդեսցուք , այլ պատուեսցուք

նոցայովքն զՀայր և զՈրդի և զուրբ
Հոգին, որում փառք յաւիտեանս :

Յորովս ունէի գրել՝ այլ երկեայ 'ի
տաղտկութենէ լսողացն զի ատեցողք
են բանի :



Վասն Հայոց եկեղեցւոյն զի հաւատար է Հռովմայ եկե-
ղեցւոյն և Եփեսոսի, որ այժմ՝ անպատուի 'ի Յունաց,
վասն համադատութեան Առաքելոցն մերոց :

Եւարդ՝ եթէ ասեն Յոյնք և Հռով-
մայեցիք որպէս յառաջագոյն՝ և այժմ
ցՀայս, թէ դուք որով սարծիք մայրա-
քաղաքաւ կամ ո՞ եկն առ ձեզ յերկո-
տասանիցն. զի ասէք զձեզ հաւասար
մեզ. զի որ եկն առ ձեզ յառաքելոցն
Թագէոս յեօթանանիցն և ոչ յերկո-
տասանիցն է, և դուք անագան ուրեմն
դարձայք 'ի Քրիստոս՝ և ոչ զհետ մեր :

Ըռ որս ասացուք նախ՝ թէ մեք ոչ
սարծիմք մայրաքաղաքաւ. զի աշխարհա-
կան է, վասն որոյ ասէ Տէր թէ « 'Իուք
չէք յաշխարհէ՝ որպէս և ես չեմ », և
եթէ « 'Իմ արքայութի չէ՛ յաշխարհի » :

Եւ մէք յանաշխարհիկն պարծիմք, այլ և զոր գոյրն՝ քանդեցին թշնամիք խաչին Քրիստոսի արտասահմանեալ զմեզ, կատարեալ ՚ի մեզ բանին Տեառն, եթէ «Յաշխարհի աստ զնեզուծիւն ունիցիք. այլ քաջալերացարուք՝ զի ես յաղթեցի աշխարհի » . և մեր խրախուսեալք ՚ի նա՝ պարծիմք ևս ըստ Պօղոսի ՚ի նեզուծիւնս մեր որ վասն նորա :

Եւ զոր ասէքդ զԹադէոս յեօթանասնիցն գոլ, զայդ ոչ յառաքելական մատեանց ասէք ուստի տրամաբանութիւնս մեր, այլ ՚ի վիպասան պատմաբաց. իսկ յաւետարանին՝ Մատթէոս և Մարկոս յերկոտասանիցն զնա թուեն, և անուանն փոփոխմամբ ևս՝ զնա պատուեալ Տեառն որպէս զՊետրոս և զորդիսն Արտաման : Իսկ թէ ասէք, թէ Ղուկաս ոչ յիշէ զնա ընդ նոսա, ոչ է զարմանք՝ թէ այլով անուամբ նշանակէ ըզնա. զի նոքա ոչ եթէ հակառակք են՝ զի եկեղեցիք են Աստուծոյ. իսկ եթէ դուք հակառակիք՝ ապա երկուցն վկայութիւն հաւատարիմ է քան զվիոյն ըստ հրամանի Տեառն :

Իսկ թէպէտ և ըստ կարծեաց ձերոց ասեմք զնա յեօթանասնիցն գոլ,


ասկայն ոչ նուազիմք 'ի ձէնջ զի ահա
 Բարթուղիմէոս . և Յուդայ Յակոբեան ,
 և Սիմոն նախանձայոյզ վիճակեցան ազ-
 դիս Հայոց : Իսկ եթէ ասիցէք թէ նոքա
 սյրոց ազգաց՝ և ոչ ձեզ վիճակեցան .
 ցուցէք՝ թէ ո՞ւմ , և հաւանիմք ձեզ .
 զի 'ի Քրիստոսէ որ տուողն է իշխանու-
 թեան՝ ոչ կարէք . զի նա բացարձակ հը-
 բամայեաց նոցա , թէ « Գնացէք աշա-
 կերտեցէք զամ հեթանոսս » անզանազան .
 զի ուր կատարեսցին մահուամբ , նմին
 ազգի եղիցի իշխանութիւննոցա առանց
 ամենայն հակառակութեան : Եւ դար-
 ձեալ՝ թէպէտ և տամք ըստ ձեզ ըստ
 ազգացն և զառաքեալսն բաժանեալ ,
 այլ նոքա օրինակ ինքեանց ունելով ըզ-
 Քրիստոս , և խրատեալք 'ի նմանէ՝ թէ
 « Յինէն ուսարուք » և ուսուցանէր ա-
 սելով՝ « Ոչ ուրեք առաքեցոյ , եթէ ոչ
 առ ոչխարս կորուսեալս տանն Իսրայէ-
 լի » . և Յովհաննէս թէ « Յիւրսն եկն՝
 և իւրքն զնա ոչ ընկալան , իսկ որք ըն-
 կալանն զնա , ետ նոցա իշխանութիւն
 Որդիս Աստուծոյ լինել » . նոյնպէս և ա-
 շակերտքն նորա յիւրեանցն գնացին վի-
 ճակ . և ոչ ընկալեալ զնոսա , դարձան
 'ի նոցանէ ըստ հրամանի Տեառն « Թօ


Թափեալ զվառի ոտիցն 'ի նոսա 'ի յանդի-
մանու թիւն նոցա . իսկ առ որս գնա-
ցեալ և ընկալեալ եղեն՝ ետուն նոցա
զիշխանու թիւնն , զոր առին 'ի Տեառնէ
ըստ նորին հրամանի թէ որպէս « Չրի
առիք և ձրի տուք » . և օրինակ մեզ Պեա-
րոս . զի նորա յատուկ էր սրոշեալ վի-
ճակ 'ի Տեառնէ թլփատու թիւնն . և
զի 'ի Հռովմայեցւոցն ընկալաւ զյաղթա-
նակ մարտին դարձեալ 'ի նոսա . իսկ այ-
ժլմ՝ Հռովմայեցւոց առաքեալ է , և կո-
չի . նոյնպէս և Բարդուղիմէոս և այլքն
զոր ասացաք , մեզ են՝ և ասին : Իսկ ե-
թէ նոքա ոչ մեզ , և ոչ Պետրոս նոցա .
ասցա եթէ Պետրոս նոցա , Բարթուղի-
մէոս և այլքն մեզ առանց հակառակու-
թեան : Իսկ զոր ասէք անագան դառ-
նալ մեզ՝ և այդ յիրաւի . զի 'ի մետա-
սաներրորդ ժամու . և այս ոչ 'ի հեղ-
գութենէ մերմէ , այլ 'ի կոչողին ձայնէ
էտք վերջնոտեալք . և այս յայտ 'ի տա-
նուտեառնէն է՝ զոր արարն . զի յոր-
ժամ յայց ել մեզ 'ի մետասաներրորդ ժա-
մու՝ և կոչեաց զմեզ ըստ ողորմութեան
իւրում յայգին իւր 'ի ձեռն առաքելա-
շնորհ առնն Աստուծոյ սրբոյն Գրիգորի
Պարթևին , հաւասարեաց զյօժարու .

Թիւն մեր ընդ քրտանց առաջնոցն ՚ի
 աուրս վարձին , զոր յաչաղեալ առաջնու-
 ցըն : Եւ ոչ անզգամու թիւն՝ զոր զկնի
 սորա ասեմք , զի զճճմարիան ասեմք , թէ
 վեհագոյն պատուեաց զանագանեալսս .
 զի վասն յաչաղելոյն զվերջինսս , ետ ա-
 ռաջնոցն զգահեկանն միայն՝ և վերջ-
 նոցս ետ զայգին հանդերձ պողովքն .
 որում արժանաւորք լիցուք որպէս աստ ,
 նոյնպէս և ՚ի հանդերձեալն՝ ՚ի Քրիստոս
 Յիսուս ՚ի Տէր մեր . ընդ ուում Հօր և
 և Հոգւոյն սրբոյ վայելէ փառք իշխա-
 նութիւն և պատիւ սոյժմ և միշտ և
 յաւիտեանս յաւիտենից . ամէն :



Ընկալ զընծայոյդ իմ զստիւ՛ զոր Ձեզ նուիրեմ ար-
 քայ Հեթում , վեհ էր ինդիրն քո քան զիս , և իմաստ-
 նայ քորժ նա՛ սյլում , զի գեղեցիկ գրէր քան զիս ըստ
 արժանեաց տեսոյ մտաց քում . լ՛ր անարգամեճար առ
 իս , և նմանեա՛ աստ Տեառն քում :







1525

1525

« Ազգային գրադարան



ML0028285

1525

